

الفص الخامس



الكتاب: الفصل الخامس

المؤلف: السيد مجدي

الغلاف: حسن العربي

تنسيق داخلي: عبدالعليم منا

إخراج فني: عبدالعليم منا

الطبعة الأولى: ٢٠٢١

رقم الإيداع: ٤٩٠١٢/٢٠٢١

الترقيم الدولي: ٤-١٩٦-٧٦٠٠-١٤٠١-٩٧٨

المدير العام: مروة المصري

التليفون: 01100528522

لمراسلة الدار: darnebog@gmail.com

الآراء الواردة في هذا الكتاب تعبر عن وجهة نظر الكاتب ولا

تعبر بالضرورة عن وجهة نظر الدار.

جميع الحقوق محفوظة ©

نبوغ للنشر والتوزيع

الفص الخامس




ديوان بالعامية المصرية

د. السيد مجدي




دار نـوـغ للنشر والتوزيع



5

th



إهداء...

هذه المرّة

ككل المرّات السابقة..

لم أتذكر تاريخ البداية..

ولكن أحفظ تاريخ النهاية.. زيّ اسمي..

الخوف من عدم الإنجاز.. مختوم رسمي..

بما يحيط بنا من عجز..

بعض ما كتبت هنا..

كان ببساطة شديدة..

والبعض بمكيّدة..

يوجد آراء قد تراها سيّدة وقد لا تراها..

ففكر كام مرة قبل ما تمشي وراها..

"نصف ما كتبت في هذا الديوان مُستوحى من الطفل العجوز "زين"، والنصفُ

الآخر مُستوحى من العجوز الطفلة "صفيّة"

منهم وإليهم..

"سَرَحَتْ فِي الْمَلَكُوتِ"

دماغي بتشغي بالصدى
وقلبي مبيشغيش وفاضي
بكذب في قولة قلبي مبيشغيش
أصوات كثير بتضربه بشويش
وتضربه وتجري
يتلفت.. ينفثوا
يتكتف.. يسرفوا في الضرب
يجري بعيد.. يتقتل بالسرد
تزدوج نظرتة للزمن
يبخل على نفسه بالتمن.. في العمر إالي جاي
يشبط في إيد المعجزات ترميه
وتقول منيش موجودة
يشبط في إيد واحد هناك
يزقله بطوبة
يربط إيديه الإيتين في بعض
يكلبشوا

يمد عينه على البعيد من الحلم
حزنه الشريد يقفشوا
يشوف جزء من الحقيقة في أول دقيقة
وباقي الحلم يتشوش
خيوط بيضه وسوده بتجتمع وتحوش
تدخل في عمق نفوخته وتكوش
(يموت في الحلم)
في رحلة البعث.. يشغل بالسلم
المتكدرس حوله
يدور على اليقين
وجاهل بوجوده في قيمة النفس
في أبسط جزء من الحدس
واجتناب الرغبة في التفكير
المسير: رسمة موجودة في عالم الأرواح
نقلها واحد راح في رحلة مش دائمة
كل الناس هتوصل لجنات الشط
حتى لو مش عايمة
هتوصل ماشية أو بتطير

هتهرب من الموت في الغريق
وهتموت من الثبات
الرُفات أتقل من الميَّة.. فهيقب على الوش
كثافة الحزن أتقل
رغم التلاعب والتلغثم والغش
والبيع بمكيالين
شايف دلوقتي نفسي إتبن
واحد جوّه البيت
والتاني بره
الأول بيضطهد ويتنهد ويراعي الهرب
والتاني سامع صوت شغف وشغب أطفال ومَسْرَة
تسلم الجرّة.. والتكرار
عشان بيمنح فرص
فرص هزلية.. مش موجودة
لو إننا مبنحاولش من الأساس
هتفيد بيايه العوده؟
الليلة مش سوده اوي
أخف كثير من امبارح



أقله مبفكرش كتير
ونص الوقت سارح
وشايف العصافير عادية
مش طير جارح
وجرحي طبيعي وييلم
مش قارح
منيش فرحان اوي
ولا خايف اوي
مجرد سارح

"لِ الأمانِي المُمكنةِ والغَير مُمكنةِ"

من وسط صمت الموجودين

اتكلم الصوت السكين

سكن العيون الملمومين

بالخضن

الخضن صُون من البرد

في ليالِ التليج

بيديّ كِتف بكتف

"يلمس بطون الدم في عُضون الوريد"

يعدل موازين الصبايا.. يؤمهم

ويصون عرايا.. يدهم

ويعزّي ميت صَل بالموت الطريق

الخضن نجم بيهدي رفيق، لرفيق

أمنية المسعى الطويل

يشبه مراسي السفن تستقبل الحب الكبير

آخر سلام، وأول راية لإنطلاق السلم

أمانِي الشُوف في أنظار الإكتفاء بالحلم

اكتفاء بيها..

بسور ملفوف على قلوب الناظرين ليها

^بأمر الاحتكار م الحب ^

والحب أصدق مُحْتَكِر.. أكرم كريم

أشبهه شبيه لطفل لئيم

بيخطف م الأمانى ألوف

ويهدي لى شايله زُلوف

يآمن بيه..

والمؤمنين بالحب قلة لو بيانوا كثير

عشان اختاروا.. متلذوش

فيا مُحْتَار خُسوف القمر قبل ما تشهد على نوره

كل أمانى الشجر يدفى ببوره

ميتلواش..

كل أمانى البشر يستلقوا فى الأحضان

ميستهوش..

النور البسيط المتدلي من المدنة ميغشيش العين.. لكن يُعين على الكتابة..
والنجم التايه في السما إلي خدني معاه في رحلة عبادة..
الوسادة المتبحرة.. إلي تكرمتم وملت أرواحنا أنا والسقا..
الفكرة الغير وجودية البسيطة.. إلي خُفت تهرب ونزلت كتبها في الشقة..
اسم ربنا إلي بشوفه في السما مرسوم وقت ما بحس بمشقة
السفر..
البعاد..
الكلام..
الغياب..

"غايبين"

هلال الجامع القابع علي المدنة
وصوت المنبر الشايخ في اولادنا
ودقات الطبول بالفرح
وصرخات القريب بالطرح
وحلم الناس يموت الجرح
وأبناء الجريدة الصبح
بأخبار الوطن إلي صار مستور
وأحداث هنا المغدور
في وقفة المبنى الحكومي
تملي أخير أنا في الدور
وكام هدمه بخام كستور
بتتقطع وتبقى كسور
عشان ملقتش مين يلبس ويتهنى
وكام مرة خدتنا القوة في مكاننا
فشدت ايدنا في ودانا
ففوقنا لقينا أيامنا.. شبه أيامهم

وأوطانا شبه أوطانهم
وأحلامنا شبه أحلامهم
لكن أحلامنا مبتقاش
عشان متباعة بالقسمة
لناس شارية..
في عيشنا بلاش..
هيجي الشاش يداوينا
ويبقى "حامينا حامينا"
مفيش بينا لا حرامينا ولا حد يبيع فينا
ونبقى أقوى بإيدنا
وندفي بغطانا وبس
ونرمي غطاهم البالي عشان مبقاش يدفينا
هنرجع زي ما البارح بيتمنى
نشوف في سمانا وغيومها أحلام.. بتبقى لنا
نشوف في دمعنا مية بنشرب منها.. تروي لنا
نشوف في الموج سبل عالية
ننطلها.. فتشلنا



نبطل نجري على غيرنا

نبطل م الأساس نجري

ننادي في رزقنا يجيلنا

عشان مكتوب

نبطل نحدف الخاين بقى بالطوب

عشان مبقاش موجود ما بيناتنا

نبطل نبني لولادنا

ما دام قادرين على بُناهم

نبطل ن نصب الحكمة لدنيانا ودياهم

عشان اختلفت الآيات

نبطل نرضى بالباقي

وبالرمة وبالفتفات

ونبقي مبات

مبات لنفوس بتتوسم تنام في تبات

وإن مصحتش



"خمسة وخمسين"

الفرق ما بين خمسة وخمسين
مش بس زيادة في كام حرف
إدراك متفاوت للظرف.. وخطورة الموقف
رؤية لتفاصيل العالم مرّة
من الأرض السابعة إلى السما الحُرّة
الفرق ما بين خمسة وخمسين
مش بس الكام سنة
بل ما فنا.. وما هو موجود
الثابت على الفطرة ومنكسر الحدود
من النوم السهل،
إلى الزحف المتلوي،
إلى الدندنة والمشى البسيط
مين قال إن الصغار بس؟
هُم مُلزَمي التخطيط
كبرنا ولسه بتتخبط في الحيط

المقلّمة والألوان ورسمه البحر والسماء.. من كام سنة
خلّت عيوني مصممة.. تشوف الدنيا محلّية
تشوف الجوهر الكامن في كل مكان
قبل مظاهر التسلية
لذلك لما حبيت.. حبيتها بما فيّا
وكبرت بحبها أكثر
ومن كتر المحبة.. كرهت
ما بين حُب التجارب، والطُرق..
تُت
ما بين معاينات الحظ..
عرفت معنى البخت.. لكني أكيد مجربتوش
تُحكّمى المنطق.. أوقات مبيحسوش
فكرت في حُبنا لالباب، وسرسوب هوا الشباك
وكل شئ بيُصع العالم
الإحساس الصغير بيكبر معانا
لسه بنتشلق ف الضيف إالي ماشي عياناً
بنتشلق في إالي رايح
ونتعذب ب إالي راح



الجراح نابتة معانا أم وليدة
كل الشكر لجوانب الدنيا البعيدة



وما تحوي من نور ساكن

هناك ما يثبت بأن الألوان الفاتحة صنعت الدواكن والعكس..

وما يثبت بأن الطفولة المجردة صنعت معاني العمر

بالشكس..

وما يثبت بأن.. أنا زي ما انا لو بصتلي بالعكس..

ي عينيك مقلوبة..

ي روعي مقلوبة..

ي الدنيا مقلوبة..

حاسس بأن دماغي مضروبة.. وبتلّف

حاسس بذكريات العمر.. يتُرف

معرفش هتزيد الألم

أو هتخليني أخف

لو جاز يكون للحياة (عَلَم) يرمز لها هيكون

"علامة استفهام"

مجنون عشان حزين؟

حزين عشان مجنون؟

(مش مهم)

الحياة/

سنين؟

ثواني؟

عدم؟

أمني؟

تعازي؟

تهاني؟

سؤال؟

إجابة؟

سلب؟

إستجابة؟

المهم تكون مسالم..



مرة هتحب السلام

ومرة هتحاول تطير

أسير؟

حر؟

مؤمن؟

مضطر؟

متواضع بكذب..

مغتر بكذب..

عبيط بصدق..

عجوز بتزعل

فرجلك تدبّ

صغير بتحزن

فعودك يشبّ

مفكرتش أساساً

تعترف بسن

بتحن؟

بتقسي؟

بتكذب؛ فتنسى



بتكره؛ فقلبك يطاوع الفراق

يلاقى في نهاية الفراق.. اتفاق

عجبية؟

ذكية؟

عبيطة؟

مستوية؟

شريفة؟

منتهية؟

الحياة السوية ضحكت علينا..

وطلعت مريضة وشبهة وسوابق..

مثقف صحيح؟

مُدَّعي؟

مُسكِّن لكل الآلام القديمة؟

مجرد مسكن موضعي؟

مفتعل الأزيمة؟

ولَّا مُتَأَذم

كبير؟

موهوم ومتقدم؟

في كام سؤال جوابا

مجاوبتوش

وسايبه للصدف والعمر

العمر هيساع الصدف

ولا الحقيقة حالفه مش هتسر

حزين سائل عن المهرب

سعيد.. خايف يكون هربان

بيتعب في حبه

، لكنه صادق

؛ فعمري ما شوفته يقول هبطان

مريض بالحب

ومش ظالم

لكن مظلوم

عقربة هي الحياة لو يوم.. لغيرنا

برتجل دلوقتي خط سيرنا

وشايف في آخره نور

بنور

قطر الحياة جاي وبينادي علينا بالدور

هنلحق
أو هنتخائق
هنساوم واحنا على مشانق
وهيفوت الجميع
هتبصلي.. وهبص عليك
هتشوف في عينيا وهشوف في عينيك
هنبتسم
وهنجري
هنستنى القطر الجديد يسري
وهنتخائق
فيفوتنا
هنبتسم
وهنجري
والسلو دا يسري
ونتعلم منستناش
فبيجي القطر وباخدنا
ومنتهناش

"رسائل الجدران"

بحب العطر والوردة

عشان بيوصلوا المعنى بدون كلمات

وأحب رسائل الجدران عشان شاردة

ما بين الفرح والآهات

وأحب حاجات وأتمتها بحسن النية

وأحب حاجات عشان غيبة

في روعي أحقق الأهوال

كانت صعبة ومش زِيّ إلي قبليها

ويمكن ترقى للمُحال

؛ فحببتها

وحبيت إنها صعبة

وفيه من النيران شُعبَة

بتاكل في القلوب بالشوق

وتاكل فياً رعمًا عني

لكن برضو بيبقى بذوق

تسييني أسوق، لكن تسترني من ضهري

وأسييها تسوق وتسهر مُغرمة لسهري

تعيط وقت ما بيصعب علياً الحزن

وتنصلي الأراضى شموع واستبرق بلون حُمره

لما تحس فيا بُبوع من الحيرة

تكونلي أعزّم الحيرة

وقت ما عُربتي تخوني

تكتّر من النداماً

بيصعب على الجميع يصوني

كانت تملك عيون بُنيّ

مفيش منها على الدنيا سوى واحدة

كانت واحدة في الانفراد بالحب

وآية في الانفراد بالنور

وكلمة في الانفراد بالحبر

وصورة في الانفراد بالصبر

ولوحة كاملة ملهاش مثيل

لا في الحال.. ولا حتى في عموم الجليل

بترقص رقص بلوري
وتتألاً في دورانها حوالي الشمس
لا هي نجمة ولا كوكب ولا حتى صخور طيارة
لكن أجمل مجرّة وهبها ربنا في غارة

-رضاء-

كانت صعبة
وترقى كمان لتبقى مُحال
وبنت من البنات العال
المعدودين ع الإيد
كأن ربنا استشناها في خلق جديد
وكانت رحمته بيّا
أحب بهيّة
تعوّضني حبيبة عجاف
وتمسح كل ماضيّه
وتكتب من جديد بالجاف
قصص مرثية للعالم
بعيدة عن الخلاف



يشوفها الجاي من البشرية
وتتصور إلى الأسلاف
ونتمرجح سوى فيها
بإنصاف
وتصدق مرة لينا النية
بدون تجريد ولا أوصاف



(مُرْتَجَل)

ترايبس الدُّنَا لِن تَقِيَّ شُرُورِ الْهَجَامِين
المؤمنين بقيمة الهجمات في أكل العيش
ونوم الدُّنَا كله مهيصحيش السكرانين
لو كان قرار النوم جاي من مفيش
الكوادر مش هتقدر تبسم
لو كان ده فيش مسجون
والشباب زينا مكنوش هيوعوا يضحكوا
لو كان شباهم ضحك على الدقون
كُلُّ يُوْدِي لِلْجَنُون

"القضايا المُستضعفة"

زيتي الطفل.. مهبول بالنور

فتمللي يحط إيديه في الفيشة

خسر القضية لما باع

كل المتاع إالي من حقه

لما جاع

لما ساب غيره مفيش قده

لما شاف بعينه القتل جده

بتنهش فيه ضباع وكلاب

لما نادوا عليه فرزع الباب

وقرر يجري طول العمر

بجعبة صغيرة محمولة

مليانة مما تقتني أمنا العولة:

أحلام شباب ضايعة

أوطان منشورة

طفولة مبعثرة مهدورة

وجراد ييسعى ف الارض فسادًا

بييع قضايا ويشتري أملاك
ويبيع صبايا ويشتري أسلاك
تتجمع الأسلاك وتبقى دمار
فتبكي ناس ع الدار
وتبكي ناس ع الجار
لماذا لا نُظهِر ندم.. تجاه سوء الاختيار؟
المسار والقضية..
حكم منتهية..
تُقال لمجرد التسلية..
لكننا لا نراها في العيون..
المشكلة لم تكن في السنون أو الدقون..
إنما في السموم المخفية..
وراء حكمة الوطن الحفية..
بحث في التاريخ المهكع
عن الأرض والحدود
وعن أصل الكرم والجود
لقيتهم مكتوبين بالعكس
هل كذب التاريخ وقتها

أم إنها حقيقة نقص
حقيقة عدم وجود حقيقة
طالما الكل كذاب
ما الحكمة في التسلل خفية
طالما قادرين ندخل من الباب
السُّباب.. ما هو إلا تقدير لبشاعة المنظر الموصوف..
والكتابة الصامتة هي دليل الخوف..
القضايا المُستضعفة تحتاج لعالم رؤوف..
قبل ما يكون واعى..
الإنسانية مرتبطة بالحنية..
وكل ما سواها غير باقى..
الإنسانية مرتبطة بالوصايا وتنفيذها..
وبالدراية وإنقاذها..
وبالحكاية وعدم تفتيسها..
وبالقضايا ووصفها بالحق..
الإنسانية هي إقرار واضح لصوت الحق..
في إنصاف ال (نعم) في حالة الحاجة إليها.. وكذلك إنصاف ال (لا)

"آية الإيمان"

أوقات بحسن الظن ..

بتبان الحقيقة

بيطيب كلام ع الحدّ ..

تكتبه ايدينا الرقيقة

- بدون تفكير -

زَيّ الإيمان مش مسقي بالتدبير

بل مسقي بالتنوير

بيان ل الفرق بين المسير والمصير

بين قناعات البداية

وما تتبع ف الأخير

بين اختيار النور إلی بيغشي العين

وبين نور اليقين .. المتين

هو أحبُّ المدارك على التارك وأتمسك

على من يتمنى قُرب ربنا وأتمسك

الرؤى العميقة للوجود

والرؤى الشغوفة للمعبود

والرؤى البسيطة للموجود

والرابط المنشود بينهم

هناك معاني ذكية بين السما والأرض يراها المؤمنون

"أفلا يتدبرون"

وجود سقف ل الدنيا في صورة سما

يُصله مع كل قولة "أنا" فنحس بمكاننا

خلفاء على الأرض.. مش مُستعمِرين ولا مُستعمَرين

مشهود علينا من الزمن.. محناش شاهدين

"المسببات متوسطة القوة إن دلت جميعها على شئ واحد فهو يقين"

تراه في العجز وارتباطه بصلاة الفجر

كأنها مآله للأخرة

وفي الفلس وارتباطه بالنزاهة

كوسيلة وحيدة للعيشة الفاخرة

في حجر الأم المريح أكثر من السرير

وفي تزيين الواقع الشرير.. بالنوم

وفي العوم..

كوسيلة للنجاة

الإيمان أفضل أداة

(مُرْتَجَل)

عَنْتَ صَبِيَّةَ السَّوَاقي

مدندنة

جَرَّتْ سِيُولَ المَيَّة

من ريقِ العِطَاشِ

مَلَّتْ عِيُونَهَا فِي العِيُونِ المَؤْمِنَةِ

صَارُوا حَيَارَى وَفِي عِيُونِهَا طَنَاشِ

اتبَخَّرَتْ بَيْنَ المَعَانِي .. مَسَلَّمَةَ

تَمَشِي، تَدُقُّ الدُنْيَا مِنْ بَيْنِهَا الطَّبُولِ

حَمْرِيَّةُ زِي الشَّمْسِ فِي حُمُرِ المَغِيبِ

تَخْفَى فِي مَوْجِ البَحْرِ كَمَا يَخْفَى المَدِيدِ

وَلَا تَنْظِفِي الأَنْوَارَ ..

يَا هَلْ تَرَى بَتَدُوقِ خَفَايَا المَوْتِ

أَوْ تَشْبَهُ الثَّوَارِ

أَحْيَاءَ مَكَانِ مَا يَمُوتُوا

أَمْوَاتَ مَكَانِ مَا يَعْيشُوا

أَحْرَارِ

"كنز الرحلة"

طريق شرم الشيخ / رسايل السما السبعة إلي شوفتها من شباك الاوتوبيس وأنا
رايح/ وقولتها قدامهم وأنا راجع / (بيلا روسيا) وإنتاجها اللطيف / الست إلي
مش فاكر اسمها وقعدت معاها على الرصيف وغينا/ كلمة بحبك بالروسي
وبالعربي من بعدها/ وقولها نتقابل بكرة زيّ دلوقتي من قلبها/

وكنز الرحلة..

سافرت قدّ ما بسافر

ومتعبتش ولا مرة

طريقي مشيته ميت مرة

لكنّ أبداً مبحفظهوش

تمّلي الحكمة في النسيان

وفي الشئ إلي معرفتوش

(المكان)

نفس كلّ مرّات السفر

كرسي أخير شباكه ع المفتوح

(الوصف)

بيوت كثير مترصصة على قمة جبل مسفوح

بتشوفها حلوة من بعيد

لكن الأكيد إنها.. مش زي ما شوفتها
يمكن شوية ضلّمت.. وبيبانها حبة قفّلت
من بعد ع المفتوح
ضاق المشهد شوية.. علشان ممثله مات
مبقاش هواه منفوح
بقية الوصف في العمدان
إلي احترافي أعدّها
وأحفظ تملي شكلها
وأربطها دايماً ب إلي راح ومرجعشي
كانت شبههم في إنها مع السفر تمشي وتختفي
لكن بتفضل برضه على مدّ البصر
بتسيب أثر
مبيتهيش
(الأشخاص)
شخصين يشبهوا بعض في التوهة
واحد طريقه طويل ميعرفلوش نهاية
والثاني واقف عند أنوار البداية
بيقولهم على فين؟

والحكمة كانت في إنهم مساجين
مشيوا في طريق مش ملكهم
ولما فهموا طبعهم
كانت رسوم الكرته ع المدفوع
وطريقهم إلي ابتدى مكش منه رجوع
(الزمان)

مُنتهى

وأنا بحكي ليكو إلي انكتب عنه
والأكيد إنه اتنسى
حتى البطل ما انكتب عنه
يمكن عشان البطولة مش بس في نهاية الطريق
والكتر أصلاً كان مكانه الرحلة
والحكمة كانت في امتلاك الرفيق
والمنفعة فعلاً في قلبنا احنا
تسلم اللغة عشان مفرقتناش وتعاملت مع الموقف
(سلاسة المزىكا)

(وميكانيكا السن).. إلي كانت داينمك وزقتنا

الإحساس الخاطف لمريض نفسي يقابل ناس بيشاركوه نفس الشبهة

درب الموج الهادي الداعم للحدث
والسلام والحضن بدون هدف
والوش البشوش إلي بشوفه حد دلوقتي
مع تكرار الرحلة.. بنفس الشغف..
الشغف تجاه الأشياء الغير مألوفة، والهروب من غراء الحياة اللذج.

(مُرْتَجَل)

ماشي ما ماشي ..
محبش مواقف ..
محبش سقوف ..
البحر عينه مني ..
والصخرة جمب مني ..
وأنا كل همي ..
ميكبرش سني ..
من غير متيجي لحظة ..
أحس إني عايش ..
مموتش .. بموت

"أحلام"

يقولوا: إحلم
وكتّر ياما في الأحلام
أمامك م السما سبعة
تضلل م الأراضي ألوف
تساعي ناس كتير جدعة
بتحلم كل اليوم تصحى
تكون الدنيا نابذة الخوف
تفتّح عين وتقفل عين
تشوف بالواحدة زيّ إثنين
مفيش فيهم مَرار ولا دُل
تشوف الميّة ساكنة الضلّ
وبتصفيّه
تشوف السجن قَمع الغلّ
وحرر المساجين بإيديه
تشوف العالم الوردى
تمام زيّ ما كان مكتوب

لا فيه دخان، ولا أوثان
ولا حرب لسنين قُدام
ولا هجرة ولا تغريب
ولا غُربة ولا تهديد
تشوف العالم العالم بأحوال إالي ساكنينه
لا يشقيهم، ولا يسلب أراضيهم
ولا يزرع ما بينهم خوف
(تشوف العالم المكتوف)
تسمي عليه، فيدعيلك
وتدعي عليه، فيشكيلك
ظلام الناس
سوادي مكنش أملاكي
لكن يمكن خَليط بشري
وزي ما قال - فلان - مرة
"عالم كِشري"
ومتكلم بصوت غيره
بياكل من حروف خيره
ويؤمن إنه بيعيره .. مصير كامل

زيّ الدماطل خارجة منك ليك
زي السنين الدائرة من حواليك
تقولك ثبُط الأحلّام
مفيش أصلاً سنين قدام
وهنعيش ع إالي فات يمكن
فلو أصلاً مفيش فايت
فبالتأكيد مفيش موجود
ولو أصلاً مفيش موجود
فقُصره ننهي قصتنا
ونعلن عن بداية جيل
هيجي بصدق مش تضليل
يعيش أكثر ما عشنا كثير
ويؤ من إنه مش هيموت
وييجي بعده جيل ثاني
يقف على حافة المكتوب
يقوله.. سلام
سلام يمكن يعيش قدام

"أقرب طريق لـ البر"

البرّ مش موجود في خيالات المتخبطين إلی زبي ..

المتعجرفين إلی بيحبوا يغوّطوا ..

سكان المتاهات ..

إلی آمنوا بالترهات .. قبل الوقايح

الرهط دا من البشر

إلی بايع

عادييت سلام بيتنا

عدد ما وقعت

وأنا صُغَيْر

وكبرت

بقيت أعدّها

وأقتنع إن أنا بتغير

وبكبر يوم عن يوم

وأفتكر إنّي هقوم

من واقعة ليلة امبارح

أنا أصلاً دايماً سارح

ويكلم ربنا علطول

من وقت ما كنت صُغِير

ولحد الوقتي بقول:-

ي رب يا ساتر

وَكلنيّ للمستور

ي رب يا فاطر

أنا نفسي بس أنول

ي رب دنيا غرور

وأنا نفسي متغرش

أنا نفسي أموت بضحك

ويقولوا دا مَضْرَش

الدُّر مش بيعيش غير في رحاب صدْفُه

والخُر مات بالطيش لما اشتهى طَرْشُه

مسمعش صوت الناس ..

ي رب نفسي في فاس

يقطع سبيل الشك

ويحطني ع الخط

ي رب عشت وحييد
عشان في يوم ما أتלט
ي رب أنا غرقان
خدني معاك ع الشط
أنا من زمان وأنا فان
وزاهد في المكان والناس
كان من سنة يمكن
حسيت بكام إحساس
دلوقتي فارقوني
أنا طال في عقلي مساس
خلاني أكون أعقل
أول مفاد كان شاذ
وجود البشر والناس
دائمًا يكون أتقل
فأتعلموا تهجروا
واتعلموا تستروا
ومتذكروش بالشر



"أحياناً يكون البُعد

أقرب طريق لوصول البر"

"أصدق معاد"

كل شئ دلوقتي قَرَّب من زمان
الأماكن كلها وَطَّتْ تواسي بعضها

من غير سلف

وحدة قياس عيشنا، ونعيش

الدواكن كلها فتحت في لونها

كأننا تبغى المعيش

الوطن أصبح وطن

مؤمن تمامًا بالميعاد

مؤمن بكل الحُب والتباريح

أصبح فلان عايل مُريح

لما آمن بإننا

كُلُّ جَرِيح

كُلُّ جعان، كُلُّ شريد

أول المرات بيمشي دمنا في نفس الوريد

لأجل الصّرر موصول

أول المرات بيصبح عمنا، وسيدهم، وزول

كله مَرَمِي فِي حِضْنِ بَعْضِ
"الوطن أصبح عوالم قُربها كامن ف بُعد"

أصغر مساحة للتبرير.. جوّه خاتة "مش لو حدي"
كلنا واعي.. كلنا جاهل

كلنا أوقات حمير
الغني لساه غني، لكن فقير
حكمة حاجات أصغر ما يُمكن
في إنها تمنح مصير

مصير سُكناها جوه الناس
وتغيرهم
مصير تمثيل ضمائرهم
وتنويرهم لضالتهم
شاييف الأنوار بتسطع من خَلا بيتهم
دليل كامل على الإدراك
"ياما حنين صادق كان في صباه عراق"

الدنيا أكبر مُحتكر للبشر تَمًا
بتخطف من عيوننا النظر
تغمينا
وبعدها تأخذ بإيدها أيدينا
وكلنا ننساق
ناكل في بعض و نرفع الأبواق

بسم الإنسانية جمعاء
وبسم إننا جازي نموت بكرة
ومنوفيش حقوق امبارح
الصلاة أجمل خشوعًا، من صلاة سارح
والدليل موجود
كرم ضيافة ربنا لينا
دليل حُبه لفعل الشيء بكل الجود

فالعبيرة مش في العبيرة نفسها
إنها في الآتي بعدها
يُصلح كسادها



والصورة مش في البعزقة

إنها في الحاجة ف ميعاها

وهو دا أصدق معاد

كل الحاجات البعيدة لو هلمة ربها تقرب

وبعدها هتزيد بعاد



"مادية مرور الوقت"

الليل يطول كل ماداً.. ويختصر م العمر دور

يوم ما نؤمن بالزيادة.. تبقى م العمر الجسور

قالوا أحياناً بنصبر.. نختصر بالصبر دور

نسكن القصر الكبير

قصر أمن بالضمير، والحدس، والمعجزات

كنّا أولاد الذوات.. مولودين راضيين بخيرنا

أبعد الناس للموجودات، والسؤال عن طيف مصيرنا

تحلى في عيوننا الحاجات حتى لو ماسكها غيرنا

مهها في الدنيا الشداد

صعب نبعث عن مسيرنا

صبرنا أكبر م الوجود والحياسة بالمكان

طوفنا أعلام البلاد.. عدناها بالعلم

رحلة في نفوسنا المهيبة

بحث عن فصّ الألم

-ملهوش وجود-

رغم إحساس الوجد

مجهول سبيل إدراكه غيبًا

لو آذاك معلوم مكانه؟

يبقى حل الأمر قيدًا

بين ايديك

أكبر مساحة من السما ملك الفراغ

وبرغم دا بتشوف قمر.. حوالية نجوم

أكبر مساحة من الأرواح.. وجوم

وبرغم دا واصلة خيوط الأمل.. في خيوط ندم.. متعلقة بتغيير

متخذرة بالمعجزات

يمكن هنرجع للذوات

بعيون كبيرة.. مُدركة للموجودات

وقلوب صغيرة.. مؤمنة

(إن مرور الزمن عبرة لمن يعتبر)

وان الندم ذنب لكن مُغتفر

وجاز منشود
وإن الحزين قادر ليعزف مُفْرِحات بالعود
لو احتاج الفرح حتمًا
الحاجة أم الاختراع
والزمن خير الدليل

وباقى من البشر شبرين
يعيشوا من هنا سطرين
يكتبوا بأيديهم
يخطفوا ليلهم
يؤمنوا إن الصباح هيجيهم
يشوفوا العتمة قبل النور
فيبقوا نهاية لبداية
بشر مش بور

إلى رفيق الضرب قبل الدرب..

المرّة الأولى إليّ بكيت فيها.. بعد ما حلفت لأبويّا إنّي مبعيطش

وجربت دا في موت نص العيلة

التمشيّة من البيت ل البحر ومن البحر ل السما

(التمشيّة الآخيرة)

"محمد نبيل" إليّ فيه هدوء العالم الثاني، وهمجية العالم الأول.. مجتمعين

الحزن الدفين والفرح الفُرات..

البارانويا الصامتة في لحظات طلب الحب بثبات..

حَطة الإيد على الكتف..

وتستيف الخلق بالتنمية قبل التريبة..

الصيد المفترق بيننا.. في حُبه للصبر.. وعدم قدرتي عليه

ونظرته ليّا قبل نظرتي له

عشان الفرق بينهم بيانلي شخصيّا

المنافشات الحادة إليّ دايماً بيسبها لي

عشان يثبتلي إني قوي
ولما بيقول: أخويا الصغير عشان يثبتلي إني بكبر زي ما بتلوي

دا مش إهداء بل نداء..
لكل إلي بنساهم وأنا بكتب..
وبنساهم في الحقيقة..
رغم إني بحبهم..

لو يجوز مهاجمة الذاكرة.. مهاجم
لكن بخاف.. تعاند
وأنسى نفسي مجماً
مهملاً
بدون سطر للخروج

كل يوم بشوف محمد بقع
عشان يقومني
وأحس إني مسنود

"خيوط النجاة"

النجوم من السجن بتبقى خيوط نجاة نازل من السما..

صَيِّ السلام والأمان..

ابتسامة ثغر المكان والزمان..

الحبيب من السجن

هو الصوت الوحيد المعزوف

بصدق..

وتوطنين..

صوت التهوين..

زيّ النجوم حواديت

بتنوّر العتمة..

زيّ السجنون كراييج

عَ الضهور قَطمة..

زيّ الزمن جَرّاي

بيمرع السّاي

ويكسر الفاكيرين
زي السنين تلاقيم
ورا تلاقيم
واحنا كما العاشقين
دايين ورا دايين
احنا كما واحد يرمز لنا الاتنين
يخلط دمانا حنين
فنفته مش فايين
سايين في ضله سكون
لدون.. بقى مجنون
عاشق لناس مجانين
زيّ النجوم أو طان
أحلام لناس مساكين
وبيوت لناس مالكين
وما بين هنا وهناك
أرضين..
لناس راضية بأيّ إثنين
مُناها تعيش..

زيّ النجوم تمّاحيك

من طفل نفسه فيك

ل أب قال -شُبيك-

لحضن ساعك منه

وساعه منك ليه

لبوسة طايه في اتجاه

شباييك..

وجبهة خارجة منّها تناديك

تستقبل البوسة

فترد بالحوسة

زيّ النجوم بتنور الضلمة

بتكافئ المحازين

بتهدي في الغربة

وتواسي في المساجين

بين القمر نجمة

بين النجوم هاجمة

بتقول أنا كل حاجة وحاجة.. محتاجها

أنا كل نقطة ندى
فتحت عينيه وعابها
أنا كل حب في يوم تَوَاك
وأواك
من بعدها دفاك
لما الشجن عراك
أنا كل رايح كان فداك

أنا حب مات واتنسى في الحلم يومها معاك
بتعيشه يوم عن يوم
وكأنه يومها سَبَاك

(مُرْتَجِل)

مُهَيَّأً لاختيار السهل .. ومختار توش

فَجِهَ قُدَامِي شَيْءٌ أَصْعَبُ

يَقِينٌ إِنِّي مَهْرُ فُلُوشِ

تَمَلِّي بِشَوْفِ دِهْ كُلِهْ فَشَوْشِ

"مَالِ النَّاسِ عَلَى مَرِّ التَّارِيخِ وَاحِدٌ

بِيَلْتَقِي الْوَرُورَ مَعَ الْمَفْشُوشِ ..

وَيَتَصَاحِبُ نَذِيرَ الشُّومِ مَعَ الْفَرْفُوشِ ..

وَيَتَلَاقِي الْبِلَالَ فِي الْجُوفِ ..

فَقُولِي إِزَايَ هَتَقْدَرُ تَتَبْتُوا أَصْلًا

وَجُودِ الْخُوفِ

"ضَرْب"

ضربوا الأعور على عينه
فأتوجع، ومقالش (خربانة)
ضربوا إيلي عاش دايمًا جدع
فأفكر القديم.. صانه
ضربوا إيلي ظنوا إنه مبيحسش
ضربوه.. وشبعوا فيه شامة
ضربوه بمُجمل الغتاة
واغتنام الضعف
ضربوه في بيته..
قبل في الشارع..
ضربوه نزولاً..
قبل في الطالع..
ضربوه برئ..
قبل إتقانه الإساءة..
ضربوني حرًا أو سجين..
رغم إني معملش بداءة..

كل المفاد كان ضرب مش تغيير
نشوة السلطة قبل نشوة التحفير
-و غرز القيمة-

القيمة في الكلام
مش في نظرات الارتياب والخسوف
الربانية جات من حبك لربنا
قبل الخوف

ودا يدعوننا كلنا للشوف وبعده النظر
والإنصياح للتفكير

سطوة "العمدة"

خلقت سطوة "خفير"

؛ و سطوة الخفير

مش مفهومة

بين كل ضرب وضرب .. سييلي فرصة للقومة

إديني معلومة!

ليه بضرب؟

حييتها لما بكيتهها

ولا فضّلت الدراما

حضنت بصدق لما شدتها
ولا كنت بتبرر هرربك
لبثت توب أبوك حُبًا
ولا خوفت تلبس توبك
ليك مناب من الدنيا
بس خايف
يبقى مش هينوبك
ليك مناب م العالم الآخر
بس شركك خفي
ليك مناب م العالم الفاخر
بس طمعك سخيف
ليك مناب من أكل البواخر
هتحمسه نفس إحساس الرغيف
(لو مش سعيد)
وهي دي المعجزة
الحياة الحزينة
بتستوي فيها الأطمعة
وتتلامس مواطن الإحساس

تستحيل كل الأشياء سخيقة
سهل الوصول ليها
لكن بدون لمس ولا انغماس
الضرب كان للأرض .. بالفاس
كان على العرض .. م الناس
كان على سهوة الكشكول .. من الأستاذ
كان على مين فاز ومين خسران .. على سبيل الهزار
الضرب كان جدول بيحسبه الأختيار
كان مشهد في كل مرات الانتظار .. بين الصحاب
كان اضطراب لحظي .. بنعمله ونبتم
بقي شيء دسيم
مليان حروف وحقاوي خوف
وسحجات
بقي مبرر قذر لكل الحاجات
الضرب كان الصبح بس زمان
دلوقتي بقي في الصبح وقبل كل مبات

"على الماشي"

الفكرة دلوقتي إزاي أفكر على خفيف

زي العيال دي

مولود عجوز قالوا

ودي مش مكانتي

ولا مكانة حد

أبني السدود تتملي

أفرح!!

تقوم.. تنهد

وتبقى تراب

ومية

ومزيج بايش

أعرف أمثل دور "عايش"

وبارع في تمثيله

سبع كاسر

أوقات بيتسرق من ديله

ويتضحك عليه

طربوش قديم ربا
لكنه عاش مع جيله
وعاشوا هما زمان
إتبدلوا الإتين
واتبدلت الأيام
وغلبنا على أمرنا
واستسلمنا للمشهود عليه من غيرنا
سلكوا الطريق قبلنا، فهيو فروا علينا مسيرنا
ومش هينزل عرق ولا زمن
روشته حلم اتسرق
روشته متحلّمش
حتى القريب من الحيط مسلمش..
فمشي جوه منه..
خطفوا الغريق من السما
ليعيش غريق على الأرض
خطفوا العياط من الضنا
ليعيش ضنا مزمن
في حاجات قديمة بحبها

دلوقتي لا تُسمن
عشان أنا جديد
مش عشانها قديمة
بقيت أعبط شوية
والإسم: ابن لثيمة
صاعقة من الدنيا
عملت معايا السليمة
(على الماشي)
كسّلت تديني حقي
حتى في عموم الجريمة
استسلمت للملل في حاجات مقدرش استغنى عنها
فحببتها..
حببت نفسي..
ومشيت معاها للآخر
أشرب نبيذ العالم الفاخر
وأفرح فرح مؤقت
الحاجات إلي بتيجي جُملة مملة
أنا بحب اتنقّط



واتنقط

وأشترى الصعب

الصعب السهل..

المؤلم شوية..

غية حمامي اتنقّضت من الطير

عشان مؤمن بالحرية

غية قلبي اتملت بالطير

عشان معرفش عنها حاجة

(على الماشي)

كالعادة

قايم أشرب قهوة سادة

وأكل بعدها مسكّر

الألم وليد الحدث

مش حب استطلاع

هقف على قمم القلاع

-وأحكم-

وهضرب بقوة همج

كل دا كلام مش مُستند



هضحك في وشهم
وهيطعنوا في روجي
وهجبهم وأشرب مية جزوجي
وبعدها هسبح ربنا
وهطوف مع الكلمات
والآهات والتناهيد
هحتسب نفسي جديد
أو شهيد على الماشي

"الموت.. وما بعد"

التاريخ

١٥، مارس ٢٠٢٠.. الساعة ١٢ تقريباً

المكان/

بلد مش غريب على المسمع لكن مسبقش وروحناه "ميت عاصم"

المواصلة/

توكتوك لواحد مصطبح كلياً، لكن يومها كان أكثر الفايقين

(معرفش أنا ليه أصلاً موجود، والأمر كله كان قدر يمكن)

الموت بياخد م الغريب مِيَّه

ومنتحسّوش

فياخد م القريب واحد

نحس بقسمته الجاحد

نِسْلَم للدموع ساحب

فيبقى كأنه ميت مِيَّه

بندفع ليه فروض دية

فيقوى علينا

"الموت أنفاس فريدة ميحسهاش غير المقصود"

حَشْرَجَة تَسْبِقُ سَكُون

وَسَكُونُ سَبَقَ لِسَكُون

وَكُلُّ مَا يَطْوِلُ السَّكْنُ

كُلُّ مَا تَطْوِلُ الِهْمُومُ عَ الْمُنْتَظَرِ

تَفْتَحُ عَيُونُ السَّكْرَانِينِ مِنْ خَمْرَةِ الدُّنْيَا

يَحْسَبُوا بِسَطْوَةِ الْمَجْهُولِ

تَشْرُقُ سَيُولُ الْجُرَّائِينِ

عَلَى زُرْقَةِ السَّمَاوَاتِ

مِرْسَالُ يَقُولُ: تَبْعَدُنَا بِالْمَسَافَاتِ

-فمتحاو لو ش-

"قُلْ إِنْ كَانَتْ لَكُمْ الدَّارُ الْآخِرَةُ عِنْدَ اللَّهِ خَالِصَةً"

فَتَمَنَّوْا الْمَوْتَ

لَوْ قَادِرِينَ

مِنْ خَوْفِي بِقَوْلِ دَائِمًا لِأُمِّي

أَنَا نَفْسِي نَمُوتُ أَحْنَا الْآتِينِ

عَلْشَانِ أَدْقِي بِأَوْصَالِكِ



أنا فاكِر برد الشتوية
وسريري صَمِيم إن كان جارك
وأرجع أتمنى أموت وحدي
وأسبق بكثير
لا أشوف الغربة فِ عين أمي
ولا حتى أشوف العمر يصير
اتمنوا الموت..
إن كنتو كثير..
-أو لو صادقين-

الوقت /

نهاية الشتوية
أحداث مش مسبقة تمامًا على كل الزوار
مش مذكورة على المارة
أحداث حتمية على الميت، وعلى الأنصار
^مشهد مُنهار أو شبهه^
مين الزوّار؟
أصحاب المدعو.. نَجَل الميت
أطفال؟



أخيار*

وعرفت منين؟

شوفت الدمعة في عين إثنين

وكأن المفقود يقربهم

قرآن يقول لسه ما سابهم

"وبشّر الصابرين"

بتلف أرجاء المكان

ناس بتصبر..

ناس بتجزع..

ناس بتبكي دموع صداها غميق

وكل ما المشهد بيوسع

دمعة بتخليه يضيق

الشيخ إسلام قال:

النية أساس أجر العامل

فإن كنت نويت

سيبها على الله

والمشهد - إن شاء - كامل

افتتح ع البقرة قوام نلحق
الفجر خلاص دقّ أبوابه
الفاتحة ي ريت على أمواتنا
وبلاش تنسوا اننا أموات
فالفاتحة علينا كما ان يمكن
هنصلي الفجر ونبقي رفات

شقّ الأذان دمع الصبايا المكلومين
فأسكتهم.. وأبكاني
معرفش ليه لما الإمام صدق
لقيتني فجأة بنساني
وشايف ست في الجنة.. معاها رفيق
بتبخر بصدق جميل
كما العشاق
وماده إيدها لحبيها على الدنيا
تقول بشتاق

"السلام عليكم ورحمة الله"

والسلام على كل المؤمنين

الموتى وإلي صاحيين

ومن في المكان قدرًا

أنا وإثنين

السلام على صوت الإمام

"توفي إلى رحمة الله تعالى"

حد من ساعتين كان معنا

ولكن ربنا اختاره

حد من سنتين كان حدانا

وقرر يفترق داره

حد مش عارف قراره

وقرر يبقىى كام ليلة

أخيرًا،، حد كان مؤمن بأن وجوده في اليوم دا

أهم جزء ف أقداره

"جرافيت"

الفن الوسيلة.. قبل الغاية

الحكاية..

الجنائية..

دوبلير الألم..

العظمة الموجودة في النفس كقيمة

قبل ما تكون مادة

الرسم الواقعية الجادة

الحبر المهذور إلي رسم تجريد على الأرض

بدون اسم الفنان

لكن الإنسان

الولهان.. بحب عشوائي

بيكبر معاه

لما بكبر..
بتكبر الدنيا في حجمها الملموس
وتصغر في عينيا
أفرد في ريشي.. وأترسم
وأرجع أكشكش في إيديا
مملكش من الدنيا غير إني أحزن وأفرح
وأدلع ما بينهم
لما طالني دمعها نسيت إنها منهم
فاديتها الدنيا وما فيها
أكتملها فيها
وقت ما بسلامتها تحب الكلام
أسمع السلام.. وأترمي جوه منه
أحترم من أحترم وميعنلش سنه
وميعنلش مين كان
ميعنلش غير السكون
وإن كان في نوم على الرصيف
أبسط أحلامي.. إني محلمش

أبسط طموحاتي .. إني متخنش
وروحي تفضل خفة
أبسط عريس في الزفة
زفة الدنيا السريعة ..
المُرعبة ..
التي لا تُسمن ولا تُغني عن اللجنة البديعة ..
الموجودة بين ثناياها

بمسك قلم جرافيت وأرسم الفتافيت
على سور بيتها العتيق .. المشبوب بريحتها
أرسمها بتضحك .. وتبكي
وتسكت .. وتشكي
وألون صور ليها بتشرب من إزاز ويسكي
وتتعازم عليًا
ماسك إزاز زيه في إيديا
لا أنا ناسي ..
ولا ناسية ..
لا أنا قاسي ..

ولا قاسية..
متواسي ومتواسية..
وجراحنا بتخُرُّ..
كفاية تمثيل إن الويسكي مش مُرّ
الخطاب هنا موجه للرسمّة
في جوهرها المكنون
لذي النون بداخل بطن النون
في مشهد إلهي خالص مترسمش
لكن استشهدوا فيه بالألوان
بتخيل المكان
ببصمة ربنا
وطيب نفس الحوت.. كذلك الرسام
فالسلام

(مُرْتَجَل)

كان وُشُه وقتها أبيض
والنور عليه من كل ناحية
و في خياله صورة ليها مَيَّته من ساعة واحدة
وهو واقف على الأنقاض
يراسل في الزمن والناس
بدون إحساس.. كما همجي
يرمي سلام على المعروف وعَ المجهول
وشايف شكلها مصبوغ على الوشوش
بتضحكله..
وتشهدله..
وتقوله سلام

"الجوع"

العيش والملح
إن صاروا صحاب
فأكيد م الجوع
والواد والبنت المختلفين
بيحبوا ساعات
لو واحد منهم كان موجوع
ودي سمة الجوع
مش مفهوم!
بيخليّ (بسيط العيش) في عيون الناس
هبات م الجنة
ويخلي النوم أوقات سنّة
ويخلي السنّة ساعات توكيد
ويخلي التوكيد كما فرض
ويبيع ف السوق أوقات.. العريض
ويبيع العريض بعرض
موجود في الطفل في نظرات نُشود الحنّية..
وفي أمّه ف أوقات التلبية..

موجود في الصفر في إدراكه لقيَم التعداد..
في عيون المؤمن لما يتحول وغد..
وفي عيون الأنداد..

الجوع موجود.. رغم المورود في حديث البعض
بأنه ضعيف..
رغم التنديد بوجوده كضعيف..

الجوع موجود.. في الجزء الأكبر من أعراض المنسحين..
عن ما سمّوه الكيف..
وأسميه أنا الشبع

"القصُّ الخامس"

بأشكر الصحافة الصفرا

عشان علمتني أدور على الحقيقة

والحقيقة العبرة

إلي علمتني منخدعش من أول دقيقة بالمسرات

الآهات.. الصوت الحقيقي للبشر

قبل اكتشاف الأغاني والسيما والكلام

أفتكر كانوا بيتنهدوا وبس

لحظة ما بيحسوا بالأم

وبيرفعوا أيديهم من بعيد

لما بيقرروا يمشوا

وبيدخلوا دوامة الصعب

لما بيقرروا ينسوا

مبيكتبوش

الإحساس كان ييمس الكل

فضروري منسيوش

لنفسنا

هنا الزحمة

بمنطقها اللثيم.. الغالب على الحقيقة

زحمة الجنازات

زحمة الأفراح

زحمة البراح.. رغم إنها كلمات متناقضة

- الزحمة الساكتة -

إللي مبتخوفش من برة

لكن بتقتل البصيرة

الأصوات الداخلية الغفيرة

بتضرب متفرقة

وتضرب مجتمعة

بتضرب في تناغم

وتضرب بتشويش

بتاكل في النفوخ

زي المسوخ

وتاكل في الزمن

زي الحشيش

هنا زحمة الأفكار/ الأنفار/ التوقيت/ المصير/ المسار/ الاحتياج/ المزاج/

الجنون/ الإثم

وأخيرًا.. الأمل

في "الفص الخامس" من النفوخ التعيس

مفيش مساحة بسيطة للتهيس

الحروف بتطير على طيارات ورق

الأحلام بعد الثبوت بتسرق

الشجر بينشف ويجف



ومدمن اللحظات السريعة

بيسف من الحاجة

هُنا أحد فصول الحياة السادة

بدون وظائف العيش وكُلفة الاستمرار

الخليعة بدون غيار

الجُثث بدون تراب الاندثار

دوافع الألم المُثبته

في دفاتر الكبار

"ذكرى تأبين تشرين"

(تشرين: شهر أكتوبر في التقويم السرياني)

الصرخة الأولى للمولود كنداء بالحرية/ الناس الموجودة في المكان لمجرد التسلية/
الشعور المتدفق في كام حد بالعدد.. وحسيته/ نظرتي للعالم كحالة دائمة/ ونظرتي
ليها كأزمان فانية/

وذكرى ميلادي إلي شوفتها في ميلاد كام حد بحبه

التاريخ الواصف لميلاده

تقريباً كان دلوقت..

والتاريخ المعلن لحياته

مجاهد لحد الوقت..

بسم إلي خلق الوقت

وخلقنا طور عن طور

واسم الظلام جؤانا

قبل النور

واسم البذور قبل الجذور والورق

واسم إلي ضلّ طريقه ع المُفترق

ملحقتس يختار



الجنة وَّلا النار
كُلَّ إِلِي مات بالتار.. رغم إنه مش قاتل
كل الأكيد إِلِي اتبنى ف طفلك
كان مبني على باطل
كل الديون العايشة بالتوريث
كان في هنا مبدأ جاهز على التكييس
وأنت كطفل وريث
مؤمن بلا حيلة..
مايل على ميله..
وفاكرها حيط شَيال..
كلنا نفس المأل..
كلنا نفس المأل..

نفس المكان إِلِي احتفل بيا
نفس القمر والناس على النية
نفس الدِكِيَّة
وبريشة صَيِّ العمود لِيَّا
أهلاً بكل الناس المهمومين ديّه



نفس الشلّل ..

نفس الصُّحاب ..

نفس الكُتب ..

نفس الخُطاب ..

ريجة التراب ..

قعدة عتاب

كل إلي فيها بيضحكوا

على كام جواب

كتبتهم ساعة حساب

بكلم ربنا فيهم

وأقولوا يوفيهم

يتمنوا فيمنيهم

ي رب أنا تايه

مبقاش في شئ فارق

وهّمّا على مفارق

دِهّم للنور

ي رب بتمنى أموت أولك
ويموتوا بعدي كلهم بالدور
ومشوفش أنا موتهم
ي رب دوّقهم دق بيوتهم
ودفيني بريجة الارض

أنا نفسي أموت ع الفرض
وأموت على طريقك
أنا كل يوم بتولد... ومبتولدش
عشان بدور لسه على ريقك

كل حاجة أصلها فوقنا
عايشة من تحتك
عشان كدا قولتلي عيش على راحتك
للنهاية أحكام
طول ما الزمان هو الزمان
طول ما المكان لسه مسلوب الأمان
طول ما إيلي هان متهانس

طول ما الحساب ميجيش في وقت الذنب

هيفضل بكرة هو زمان

ويفضل بعده زي ما كان

وتفضل انت ابن امبارح

وتفضل برضو لساك سارح

وتايه في الطريق وحدك

يوم ميلادك مش معاد راحتك

أول قرار منسوب إليك وحدك

"الكابوهات الجراد"

الكابوهات هنا مش مقصود بيهم إيلي في المدرج بس، لكن كل إيلي بيحطونا على

بداية الطريق؛ ويتوهوا

ل الكابوهات في الثالثة

مش في اليمين ولا في الشمال

لسيد ومؤمن وفهمي

حُرَّاس عَرِين شَخْص الوطن

ل العاملين في قطاع الشَّقيانين

المؤمنين بالكَدْح المَكَانِي

ل "مَجْدَة" في غيظ الدُّره

وعامل المصنع عم "يَمَانِي"

لُعمال السدود.. قاطني الحدود

المضرويين على الأعناق بالطول

تقديرًا لصوت عمَّنا الغول

ل المهدور حقهم دول

والهادرين حقهم لأ

لكل الأصوات الغير مسموعة

في أرجاء الموحدة
مصر الكائنة حبيبة
ودلوقتي مهيش لينا
منايع نهرها المدعو
بيمشي في شق في ايدينا
للبلد إلي كانت من زمان بينا
أعز بلاد الله
حباب أوزع صوتهم ع المواليد الجديدة
وأعرفهم إن الصوت غلب السياط.. أحيان
وإن المهمة هتبقى ف البقاء حيا
مش في إعلاء راية الكيان
وإن الكيان أسطورة حية في العيون المؤمنة بيه
لكنها لا تُعني ولا تُسمن
لو القائمين على العمل جوعى
"الجوع غلب الموت في إسقاط حقيقة الثبات الكامل"
ولإن الكمال لله
اشتر كنا كلنا أحيان
وامتل كنا بطبعنا أحيان

وعيشنا سنين كثير في أمان
لا في بيننا خروف طماع
ولا معزة دايرة تلف على قوتها

العاملين في المصنع المعزول عن العالم
استووا مع مُلاك المصانع في بيوتها[^]
وكلهم مُلاك

ل الكابوهات الشُّداد
المُقيدِين وهَمَّا
ل الكابوهات الجُّداد
القادمين سَهَمًا
يقودوا مَسيرة السابقين

مُبطلي تجريم الصوت
إلي قالوا:

"حررنا بلدنا من الحرامية وبندفع تمن الحرية"

والحرامي فاني حتمًا
مش جديد
والشغب هيدور ويرجع
يضرب الإيد إلي وجعت.. بالحديد
والبراءة هتبقى حُرّة
وينعزف بالعود قوامها
حرية.. حرة.. علوية.. حرة
كلنا عشنا في جَرّة
وكان قرارنا خروجنا برة



(مُرْتَجَل)

الدمع طاب ع الحَدَّ
زي الحَطْب ما يطيب
والحُرْ أْفنى العمر
يضرب لكن ما يصيب
والصبر مش بيعيب
إِلَّا إْلي مستعجل
فلو انت مستعجل
خاوي ايديك بإيدين
علشان ما تتكعبل

(مُرْتَجَل)

بأعدّ الشجر والورد
وأشم في نسيمهم روايحك
وأعدّ البشر بالفرد
محدث وهبني طرايحك
وأعدّ النجوم في الصبح
وأعدّك معاهم كنور
وتكنس عبايتي الأرض
وأفضل وراكي أدور
وأعجز وأثور...

"أهواء الانتحار"

دي للأبراج العالية والبحر وشرابين الإيد

وألم - الوهم - الشديد

فجأة الحياة صغرت اوي

وكأنها رجعت شباب

حَتَّ خُصَلْهَا بِالسَّوَادِ

وعينيها وسعت من جديد

وقفت على راس الأكيد

بتمدله يغيثها

والشك جاي من ظهرها

بينادي ويغيظها

و ما بينهم الإتنين أنا

واقف قُرَيْبٌ لِّلْسَا

بقولها شدي

أنا مُكْتَفِي حَدِّ الْغَمِّ يَا رَبِّ مَا تَمِدِّي

الحياة أكثر كمان

أنا زبي زي زمان

ومفيش حاجة أهم.. من إيلي راح هتروح
لو عشت يعني يومين كمان
كل إيلي كاتم الكلام هيبوح
ويكون كما الأحرار..
ي رب عشت حياة زي المدار
نقطة بدايتها النهاية..
ونقطة نهايتها البداية..
وأنا طور طحين بيلف
لأجل ما يطحن الدنيا
وبرغم دا مطحون
طور السنين ابتدي بالنوم الممل
وانتهى بالنوم الأمل
ولأني قصيت الشريط قبل الحدث الأجل
مبقتش أحس ببهجته
زيّ إيلي لسه في أوله
يتأمله..
يرسم خطاه..

القيمة فعلاً في إننا نعرف ميعادنا
فنبطل ننتظر
نكتفي بما بين ايدينا
فنلاقي ايدنا بتقندر
وبتقوى على كل إلی أفلتها زمان
وكأنها مسكت زمام
كان همّاً ماسكينه
ربنا بيوّز الأذوار
والدور الأهم ناسيينه
دور القدر في الاختيار
يلف على مين
دور الزمن في الاختصار
ينسيّ مين ويذل مين
دور الحياة فيائها تصبح وطن غالب
فننسى أهواء السما والانتحار

"كلامنجي"

من النبلاء الجالسين أعلى المَجْمرة

إلى الحقارى

من المبادئ المُسمّاه بالمنظرة

إلى مبادئ الشارع

"الموعظة تختلف باختلاف أدوات الواعظ

فيستوي الحرامى مع العبيط..

والجاهل مع الواعى السديد..

في حال عدم إيجاد البيّنة

اسمنا.. بيدل على كَمنا أم على كَيْفنا..

الكلام دايمًا يسبق السمع خطوة

وعشان كده البعيد كلامنجي

أكثر صحابي تأثيرًا كمانجي

أكثر صحابي تأثيرًا سميع

إعجابنا بالفكرة ولا بالنوع؟

المبدأ الملائكى مسموع

ويصنع الفارق

أنا برضو سبتها على مفارق

لخوف في اسلك طريق واحد
أيها أفضل تجربة شبه كاملة أم توقف جاحد؟

الأمر مُنتهي أنه لا يوجد منتهي
في رؤية الكلمة وتقدير المشهد
طالما الحكمة بتطلع من أفواه المجانين
فأنا أشهد.. بإننا كلنا بني آدمين
ولينا الحق نتكلم بما نعلم
جائز هيطلع مننا واحد يفسر من خفايا الكون
جزء مما يدره الله أعلم

دلوقتي آخر عقرب هيدق
والعبري هيشق طريقة
هينور الطريق للمؤمنين بيه
هيسلموه عينهم
هيفضل التايهين يتنشقوا على نفق يحميهم
لأول مرة هيحفروا بأيديهم
في رحلة البحث.. هيتحول العدم لكواآت وبلاعات
هتشدهم..
هيدخلوا حلزونات الضياع
والغضب
والمتنع
وثقل المتاع
وشغب الجياع

"الشغب البرئ"

الشمس نازله بحُكمها على أرض سافلة
ساكنيها سافلين
مليّت خيوط الدفا.. شالت معها النور
صارت بصر للمُعدّمين
حسّت بنبض الجفا
في قلوب جفايا.. محرومين
سألت بصوت القسي
لو كان يعيش آدم.. مش كان هيبقي ف الوجود
بني آدمين

بيحسّوا طبعنا من غير ما نتكلم..
ويحسّوا سرّيان دمننا من غير ما نتألم..
ويشوفوا فينا الطيبة بتسلّم..
ايدين مجاريح ..

طاير هناك جناحين أحرار، ومش أحرار
الدم ينزف من ما بينها جَرار
ولإن ملهاش الحِيار
زيّ الوطن بتلمّ طوّالي
دمها أصدق عشان غالي

"يغلي الحديد وسط الحديد يرخص بين القضبان"
"يغلي الحرير وسط الحرير يرخص بين الأحرار"
هات الحرير واديه لفقير.. يصبح من الأشرار
وراحمي الشغب م الناس.. ياكلوه بحب الجار

الشمس ندرت ع إلي مات بالعادة، واتعود
طالت سجون أرضنا، لكن هنتقوت
ونقيد بنار حُبنا

الحب دايماً في الوجود ضدنا
مع إننا بنحبه
والحلم دايماً يتسلب من وسطنا

يمكن عشان نده

ومبنيش

الحلم واحد والزمن منسيش

(الحلم صوت المكان وسط الزحَم والناس)

وقت انعدم إدراكنا للموجود

رَصّة إيدين لبيت غريب بالطوب

أو حدّ عايش ع الأمل يدوب

الحلم أصدق واحد في وجود مكدوب

كل المؤمنين بالشغب البرئ

سَيِّد، وليه أسياد من العبيد

سايقين نيران الجهل

في مُربّع المكتوب

بيهدّوا كل الطوب

ويمحوا ف ملامحه

أقرب مثال للدود

واعي في جوامحه

بينخر في الوطن ينهد
وينخر في الحديد كيلين
ويخرج المساجين
يوعى لقدم غيرهم
حيط المكان واحد
شاهد على سيرهم

على الشغب البرئ/ نداء النجدة في عيون الغريق

"سَهارة"

كل القصايد

مقصودين..

كل الحبايب

معروفين..

كل القلوب

المسكونين..

ساكنين..

كل الورود المسموعين

ياسمين..

كل الحنين

تسمين

لحنين ملوش مرجوع..

كل العيون

تمعين

لخضوع مفهش رجوع..

"الشوق تَمَلَّى ضعيف عشان شبيه للجوع
واللقا برد وسلام على كل سيد موجوع"

يا بنت تَمُور

ي ساكنة جُمُوح بنات الحور.. ورقتهم
ي خاطفة القلب.. صار القلب مكتوفك
ي سايبية النفس وفصولها
بقت مقسومة في كفوفك
ي جيش محكوم بأمر الله
بأمره يبقوا في صفوفك
ي كام درويش بيدروش
ويزهد في المقام صوفك
ي منموشة ومنقوشة
بروح مخفوفة وبشوشة
بتغرق كل يوم شوشة
وييجي ربنا يشيلها
وتدعي..

فيجي مَكُّه ينشلها

ييشرها بتباشيره

"ملاك يشبها في النور إلي بيُعيّره"

ياخذها بإيد لا هي باردة ولا حامية

يوديهها جنان ع الارض

تعيش فيها حياة وافية

وفي الآخر يسيب مرسال

على وردة

تعيش الوردة

يتبدل مراسيلها

في زهر يموت

يموت ريجه

وزهر يعيش كما طائر

بيقوى من عصوف ريجه



**"زين" أخذ نصيبه بين السطور..
وجه الوقت على "صفية" بحكم
الدور..**



"صوفية"

إلى ساكنة الورد..

الكريمة بنتُ الكريم

"صَفِيَّةَ حسن الأمير"

أمّا بعد:

فقد جانا بيان الموت منهم

أمّا احنا فشايفينك عايشة

الدار من بعدك ملهاش حسّ

كل الأحداث صارت بايشة

والواضح هنموت من التفكير

الحسبة بإننا لسه كثير.. مكنتش صواب

الواحد.. لو واحد يفرق

تصبح أحلام الكل من بعد سراب

إلى ست البيت، القائمة بعمل كل أفراده..

البيت من بعدك صار مهدود
وأتبني زي الناس بالطوب الأحمر
وكأنه غريب..

الطينة في الأرض بتحلفلك
من لسه قريب..

، وكأنها منستش
مش زي ولاد الكلب
بيقولوا عاشت ومعاشتش

الحكمة بتفضل في مكانها
تمامًا أوقات ما اتقالت
والذكرى هتحلف بسلامها
لو صورة أصحابها اتشالت
والعالم كاتب بتاريخه.. الآتي
بِسْمِ فلان ابن الأصول الطيبة
ساكن جِوار "حَيِّ الكبير"
بسم الشواهد في المساجد والمسكن
كتبوا الدراية والمصير

كتبوا بإنك مُعجزة.. رؤية وَبصير

ابتسامة المشهد الأخير على جبينك

بتلمع قدامي وأنا بكتب

ونبع الميَّة إلي حسيته في وريدك

يا بختك

والصَّبِّي الغريب إلي انعكس على صورة جدي على الحيط

الحب النابع من المكان زي الهوا في البراح

الحبر إلي بينقط على الورق دلوقتي

بين المحبة والجراح

والبصر الحديد

إلي لمس عيني حالاً

فشوفتك بتشاورني من بعيد

رافعة إيدك.. بالدعا

فدعيت

يا أيتها النَّفسُ الراضية

عن الكُل

الغير قانطة برحمة ربنا

المتعففة عن الدُّل

هذا سلام منيَّ أنا

ومن الكُل

إلى القبر الملىء بالفُل

والمُصطلي بالنسيم الحاني فوقه

لكي ولهم كُلُّ السلام..



العالم المنحرف..

مُقترف الذنوب..

بيتمادى في إدعاء السلام..

بيرقص بدم بارد على قضايا الظلام..

لا يعتبر لاحتمالية كونها فرصته الأخيرة..

متفاني في الضرب..

بآخر مخزن ذخيرة..



"الوثيقة"

العالم بقى زي الرقصة
مش لابس من فوق ولا تحت
مكشوف ع الآخر
من الآخر مش خاضع لمكان أو وقت

العالم باصص على عالم
مفيهوش أحكام الدنيا السوّ
منظاره مسدود كلياً
لا بينظر في الدنيا ملياً
ولا حابب يتكلم على غيره
عالم ببص على الدنيا بعينه
مش بالمناظير

متأخر جاز
أو جاز بدري
واقف أحيان
أحيان بجري

صاحب أموال

أيام أُجري

وتلف اللفة

ندور ونلف

بنخف فنمرض م الحفة

التقل ساعات جواه العفة

وساعات مش جواه ولا حاجة

أحياناً إثبات لجنابك.. إنك هارب من شئ عادة

خايف من حتمية جوعك

فبتاكل أكالات مش شبهك

الضد بطبعه صبور جداً

لو كان طماع مش كان أكلك

"إذا ضرت فأوجع"

سَدَّ الفراغ بفراغ أشدَّ..
هتَمَل منه فيبقى جدَّ..
وانصَّب لكل حدود في حدَّ..
هتعدِّي حدَّ فتلقني حدَّ..
فتمدِّ مدَّ..
هيَّا الحياة أصلاً مشدَّ..
مَطاط مواكب للأجدَّ..
أوَّله دايماً أجدَّ..
وأخرته أسهل ما جدَّ.. على الجديد..
تبعُد بعيد..
نظرك يزد..
ويصير حديد..
فالغالي يرخص..
ترجع تقرب من جديد..
فتصير بعيد..
فتبقى أرخص..



فتعود بعيد..

عاجز تفلنص..

فين المقرّفص..

جوّه تلاكك الحياة..

متخبي ورا ضهر الجنّة..

بيقولهم ساعدوني..

زيّ إيلي بيعزيّ في عزاه..

ويقولهم فارقوني..

وهو إيلي ودّعهم..

بُصّ لقصورك من مكان ما تردعهم..

واجبر كسورك من مكان ما توجعهم..

-واضرب فأوجع-

وبعدها أعلن سلامك..

وانصّب لجامك..

وامسك بإيدك صولجانك..

بطلّ الحياة.. سلّم وحارب..



كتبوا التاريخ بإسم الجناة باطل..

وهما أغلبهم مُحارب..

فاوعاك تصدق إن الحياة لعبة..

وإن الوشوش الواحدة نعمة..

وإن النظر من الاتجاه (س)

ينفي وجود (ص)

قيمة الحاجات في الضاد.. والضدّ

في هزار قلب للجد..

في قريب تشوفه بعيد..

وبعيد بيان أقرب..

في حبيب ومتغرب..

وغريب وبيقرب..

في صغير ومتشرد..

مع إنه أولى بالحياة..

في عسكري واقف بيدي الانتباه..

ويطلّع لسانه على الجاه وعلى السُلطة..

قيمة الهروب أحياناً في صعوبة الورطة..



(فاوعاك تصلح غلطة بغلطة)

واسمع كلام إالي قال:

"ي عم يا مستني العصا..

من عبء عمره ما يوم عصى..

الكُل هنا عبء العصا..

فأمسك عصاك وأضرب فأوجع..

"دوشة صباحية"

دلوقتي فكرت أكتب قصيدة ملحمية

مش طويلة ولا قصيرة..

مش مترتبة ولا متنتورة..

مش هحكى فيها قوي..

ولا هكون سوي..

ولا هتلوي ولا هلوي دراع حد

(مجرد كلام)

الساعة "سبعة" بالتهام..

مسعى الهمم والههم..

والعمم السمان..

ومعاد مناسب للعواظلية زينا

يحكوا ويتحكي عنهم شوية

ويوصفوا الدنيا البهية بعينهم

يمسكوا حواف العالم بإيديهم

من غير زعيق فلان

وحكمة علان

من غير دخان سجائر مزدحم

وعيدان

من غير أوثان وأفكار مفضخة غريبة

من غير زبايب صلا لناس مريضة

من غير أفكار زمان ولا حتى أفكار دلوقت

بداية يوم.. بعادة شديدة

كلمت واحدة غريبة

والأغرب إني حبيت فيها حاجات

شوفتها في البعيدة

(بنتي إللي مخلفتهاش وماتت)

معرفش الشوق بيصنع هواجس شريدة.. تجاه ما نحب في من لا نحب

أم إنه مرض نفسي مُقتَضَب.. في أوله

بنصلي له ونبوس إيديه

جورنال الجمهورية

في إيد صبية صُغيرة
بعثها جدها تجيبه.. ووقّعت كام خبر في السكة

اقرا الحادثة....

كل إلي كان ع الدكة.. هياخد نصيبه من الدنيا
كل إلي عاش ع الفكّة.. ربنا هيفك ضيقه
كل إلي مات سكة.. ربنا هينور طريقه
كل ما أجي أتكى على الوجع
أفتكر إنه مات عشان محدش بلّ ريقه

ريق العطشانين.. مروى
ريق السكرانين.. ناشف
ريق المذكورين.. زُمرة
ريق المنسيين.. ناشف
ريق المظلومين.. حُمرة
ريق الظالمين.. ناشف
ربنا وحده إلي كاشف
الحقيقة..



ب الدقيقة ..

الساعة (سبعة وعقرين)

شوفت بعينيا إثنين

حسبتهم تايهين من بعضهم

بيتناغشوا من بعيد ..

ويشو حوا ..

وجبههم عيل ماسك إيدين بتمر جحوا ..

وتدادي فيه ..

تبصله .. تضحك

يصلولوا بيكوا .. ويهروا من عينيه

بقدر جهم ليه

مخضنوش بعض لكن حزنوه

فضل بينهم شوية

وبعدها فارقه

الساعة (سبعة وعقرين وعقرين)

منصوب كمين تحت بيتنا

عليه ظابط ومظبوطة

وعسكري حيطه



وكام حديده مقفلة الطريق
كل وسائل توفير الأمان على قوهم
وتقييد الزمان على قولنا
أنا نصي فايق والرفيق عايق.. ومعمي
وحديد البوكس مآني
والمسير ساقني.. وداق ودوقني
لما اترميت في الحبسخانه
وقتها الطابط سألني
هاه آراراجي وليك مبادئ ولا سد خانه
قتله لما زغدني.. بالأمانة
واد عيبط.. وسد خانه
الساعة سبعة (وعقريين وعقريين وعقريين)
طالع فاروق وأخوه حسين
على باب ربنا
ينادوا
ي خلق ي محسنين لله
هم أنت وإياه
واعطونا مما أعطاكم ربنا

وحتى لو معطاكوش إدونا
مش هنفضل طول حياتنا سائلين
لما يمكن تحبونا
الساعة ٦.٣٠ قبل ما أكتب كل دا
بعث لمصطفى أقوله.. ياني عظيم وشغلاني الحياة بعدين
وتعبان
فرد وقال:
مكنش مهم تبقى مهم..
بقدر ما كان تكون في أمان..
فسبني أنا..
فصدّفته..
الساعة داخله على مجاعة
والجوع واخذني في إيد
هاكل وأنا
وأشترى اليوم إلي بعده كمان.. مقدماً
وأبيعه ببلاش
على قدر معرفتي بسوء تكرار الحاجات بكررها
ومعرفتي بأن إلي هيتقال ميسر ش.. بأررها

ومعرفتي بعدم أهمية حدوث الفعل .. بطلبه بشدة

حِدَّة الوصول للحاجة بدون هدف مش حِدَّة

دلوقتي عيني بتقفّل

أبويا وأمي والعالم صحبوا وهتغفل

وهيشوفوا دمعتي على خدي

وإن مشافوش هيسمعوا..

وإن مسمعوش .. هيعوا..

إني مبكحش زُكام

بل كلام

طفحانه

وإني مجمعتش سلام

عشان أزرع ريجانه

وإني جبان

كل ما بحس الخوف

بنام

"قصصنا"

ي رب أنا ابتليت بالبلا الأزرق
مع إننا صحاب
وبقيت أشوف الناس بالاختلاف
أغراب
حتى إلي قولتلها خيلنا صحاب.. دلوقتي حبتها
أو يمكن محبتهاش
بتعلق كل يوم بقشّة جديدة
وبرضه بغرق
يمكن عشان الحياة مسروق وهسرق
وأنا دايمًا بختار مسروق
ي رب خِفّ الحمل عني وشدني عندك لفوق
يمكن أفوق
النوم غلبي في ساعة الحق
فنمت يومها وقلبي دقّ
فصحاني

سايب مكانك ليه لبديل تاني؟
أقوله بنبرة مهزوزة
أنا مش بديل
ولا عمر دا كان مكاني
أنا عمري ما قبلت ابقى تاني
حتى في طابور الفرن
أنا دايمًا بختار الركن إلي مفهوش دوشة
مع إني زمان كنت أراري وبحب الروشة
أنا كنت زمان أصلاً كُلياً غير دلوقت
كنت بنام بدري وبحترم الوقت
دلوقتي بنام يوم ويومين لأ
وباخذ كام حباية ضغط.. من غير مية
أنا كنت زمان بضحك أكثر ما يضحك علياً
وبحب أشوف كل حاجة في إيديا
دلوقتي إيدي فاضية
وعايش في الرضا الكامل
إننا مش مخلوقين كاملين ولا عمرنا هنكون
وإنك بُعثت الدنيا دي داين



دلوقتي بقيت مديون
لنفسك قبل كل الناس
عشانك بس عشت كثير
مفرط في الشعور إنك
فرد نافع وليك حقوق تستنفع
وان صدرك صحيح واسع.. ويستحمل
لكن ضاق بهمومه خلاص
مبقاش ينفع..
تصبوا فيه من ناركم تاني

كل المحيط يدفعك لتكون أناني



"حَتَّى أضعف الإيمان"

(عن التطبيع المُريع)

أنا قلبي واخذ من حكاوي الأرض دي كثير

جُغرافيا الأمل

على أرض مرسومة بدون حدود

تاريخ اكتمل

برسائل الدم ما بين الجُذود

فارغ الرصاص

على امتداد الطُوب

والتزام الصمت

كأحد أركان الثُبوت

وقت الكَمَد

السلاح المرفوع

كأول البُنود

والسلام المدفوع

كأخرهم

والدولار المُقنع

إلي عاوزك متبقاش منهم

أو متبقاش موجود

إسرائيل بتنخّر فينا زيّ الدود

إسرائيل بتحضر جنازاتنا بكُلّ جُود

ومعاها ورد

بتوصّي أقرب حد لينا

يمسح تاريخ السرد

ويزيل الأدلة

عاوزه أبقى واحد فينا يقاله غلّه

تديه عكّاز لكن في أي وقت تقدر تشلّه

تقدر تتماثل في ضلّه

مكنش لازم أبكي دم

عشان تشوفوا دموعي .. حزن

مكنش لازم ياخدوا كمّ من الهوا والناس

عشان أشوف في عينيكم إحساس

بمشكلة الوجود

أقلّه تبقى إنسان .. يعني موجود

مفِش مُعْتَصِب بِيغَيِّرْ حَدُودَ مَكَانِ الْجَرِيمَةِ
الْبِلَادِ بَتَاعَتْنَا كُلَّهَا نَفْسَ التَّيْمَةِ
جِلْدَهُمْ تَحِينُ
وَمَتَخَشَّبُ
كِرْشَهُمْ سَمِينُ
وَمَتَقَسَّمُ
كَلَامُ، وَفُلُوسُ، وَدَمُ، وَكَدْبُ
الْخَلِيْجِ لَوْ مَقْدَرِشْ يَنْطِقُ
هَيِّدُ
أَوْ هَيْسَبُ بِالْدِينِ
الْعَيْشِ الْكَثِيرِ هُنَا أَصْلُهُ عَجِينُ
دَوْرُوعِ الْأَصْلِ
لِسَّهُ فِي دَمٍ عَلَى شِبَاكِ الْفَصْلِ
مَنْ أُخِرَ قَذِيفَةُ
لِسَهُ فِي دَمٍ عَلَى بَقَايَا الْأَكْلِ
لِسَهُ فِي دَمٍ عَلَى حِبَالِ الْغَسِيلِ
لِسَهُ فِي شُعُوبِ دَمِهَا تَقِيلُ
وَنَفْسَهَا قَصِيرُ



لسه فاكرين بعد كل شئ

إننا إلی بنسیر

مش ربنا

ودا إدعاء زائف

في ناس مولودة معانا في نفس البيت

لكن مكتوب على جبينها خايف

ومكتوب على شفاها جبان

زمان كُنا موحدین الأذان

دلوقتي في آذان مكذوب

ودُعاء باطل

إسرائيل بتلعب دور الشاطر

واحنا متمسكين بدور البليد

الأرض الطاهرة رفضت قبول شروط العبيد

وتمسكت بالطُهر

الحاصل عشان مش متوقع

هعتبره عُهر

ومش هكتفي بالتنديد



السا بتقول مفيش جديد
الأرض للمولود
والقدس للمعبود ويعلم مين هتشفعله
الدم إلي على بابها
صاحبه هيقابله
وهيحيكه
مفيش فلسطيني مضطر يناديله
عشانه عالم بيه
فلسطين داري مين مُنجيه
وملتزم بالصبر
لكن أضعف الإيمان بالنسباله
كان تفريطنا في الجبر

"عشوائي"

في مكان بعيد
لا فيه حياة ولا موت
ولا فيه سكون ولا صوت
ولا فيه جشع للقوت
مفهوش حاجات تتمس
بتسلم فيه المثالية من الحث
في بين نجوم ونجوم
نجوم مبتنورش
في بين غريب وغريب
قريب متتصورش .. حبك قدايه!
باشر كفوفك
واستوى في خوفك
ورسم لك الطريق بإيديه
ونصحك:

سَلِّمْ إِيديك مَطْرَح ما تتعلم
كُلِّ إِيلى قِبلِك مات.. دا متعلمش
كتبوا على جدار المسارح
ضحكوا جميعاً فاوعاك متضحكشي
وضحكت يومها حلفت متألمش
تعرف توَعِّي الناس لتتكلم
ونادر ندر متتكلمش
أبعد بعيد للسجن.. وواهم المساجين
مجنون بيقتع ناس
متتجنش
بين الحاجات الواضحة
في كام مصير مكنون
الخِضر قال لو موسى يصبر.. كان أكيد هينول
افتراض سوء النوايا ملازم المجهول
بين كل حاجة وحاجة
منحة مش بتدوم
نداء للقوم..
دوروا في الجحور المستخبية



هتلاقوا ألف أمنية وأمنية
وفي أزاز البحر المرمية
عن رسايل من إنسانية إلى إنسانية
يُحْت فيها..
على إدراك الوجود والبحث عن المعبود
بين التسليم الكامل والحدود
توجد فكرة/
عصا سليمان..
وقيمة الدود..
في تحديد مصير الجن
الباحث عن الحرية

"ريشة"

النص دا للخُفّاف..

لَسَّه قلبي بينبض..

لَمَّا بستنى

ولمَّا بتعافى بعلو الصوت على الأيام

لَمَّا برمي المسامرات على الناس في الشارع

وأنسى إني رميت السلام

ولمَّا بقول لغيري كلام

وأحس بنبرته الهادية

ولمَّا بشوفها ماشية مُتهادية

وشايلة الكراسيات ع البيت

لَمَّا تملى الشقوق وشي

وأقف قدام المرايات وأضحك

ولمَّا أسامح ناس طغوا في غشيّ

وأقف قدام الزمان عريان

لما بتمنى الأمان في الموت

فيجيني الأمان في العيشة

ولما بتخيّل نفسي ريشة

بتلف أرجاء المكان

ينفخوها الناس

فتتلون بلون جوفهم

تحمّر لما الدم يحمي للحبيب

تبيض لما الحزن يكبر ويشيب

تسود لما الدنيا بتميل تخيب

وتكف عن طيرها

لما يميلّ الحبيب

الريشة دي إحنا، وإحنا مدمني الألوان

إحنا إلي بنحب الكلام، أكثر من المفاعيل

وبننساق ورا الأوهام، أكثر من المداليل

بنحب ملح البحر، ونسب السبيل

نعطش.. نشرب أجاج

نستشق هوا الزحمة.. بنفس العليل

احنا الصبايا المكلومين

بالاضطراب والنوم

الهريانين من الجوع

بالصوم

والهريانين من الناس

يادعاء حب الهدوء

الناس إالي لما بتتشم، بتكلم بذوق

ولما بتحب عمرها ما بتسوء

ولما بتموت.. بتموت في هدوء

ولما بتتألم مبتشكيش

الناس إالي فضّلت صور الدنيا



على صور الأفيش

وفضلت تعيش اللحظة

قبل توثيق المعيش

الناس إلي بتنسى كل حاجة

وبتاخذ دوا للتخلص من الطيبة بدون مفعول

الناس دول

إلي بيشبهوا الريشة

أصحاب الأرواح الخفيفة



لِيّ فَاكِرِ اسْمَهَا زِي تَارِيخِ مِيْلَادِي، لَكِنْ مِيْنْفَعِشْ أَصْرَحْ بِيْهِ (لِأَسْبَابِ عَامَةِ مَشْ
خَاصَةِ أُوِي)

"غَيْت"

تَحْيِي اللّحْظَةَ إِلَيّ خَلَقْتَهَا الصُّدْفَةَ

وَجَمَعْتَ بَيْنَاتِنَا

وَيَسْقُطُ مَا قَبْلَهَا مِنْ الْوَقْتِ

عِشَانِ فَاتِنَا بَدُونَ بَعْضِ

النَّظَرَاتِ الْبَعِيدَةِ مِنِّي وَنَشُوذَهَا أَحْيَانًا..

وَالنَّظَرَاتِ الْقَرِيبَةِ وَنَشُوذَهَا أَحْيَانًا..

وَالْمَكَانِ..

-قَبْلَ مَا حَدَثَ-

عِشَانِ حُضْنِهِ إِلَيّ سَاعِنَا

وَمَشِ الزَّمَانِ..

إِلَيّ سَرَقْنَا

وبعدها باعنا

الموجودين إلي أخذوا بالهم

، لكن معلقوش

وصوت الدنيا إلي اتكتم

لما ضحكت بوشها البشوش

شعرها المربوط .. زي ما بحبه

وشعري المنكوش .. زي ما بتجبه

والصوت المتشابه في جدته وحده

شكل السما المخطط شبه لبسها ولبسي

مشيتها السريعة البطيئة

ونظرتها البخيلة الجريئة

(اللمة والسويقة)

إلي محدش فيها أرادنا لبعض

واحنا صدقناهم

إلى:

الزميلة الشريفة

والحبيبة الظريفة

ولمحة الحب الخفيفة.. إلي عاشت

رغم محاولات الدفن المتتالية

بحبك زي مبحبكش

هربت يبقى متهنتش

وهنتحسر

بحبك قد ما بحب في المشاهد.. أقصّر

بحبك قد ما بحب.. أسيب الحاجة وأفسر

بحبك قد ما بقوم من الكوايبس.. متأثر

ومن الأحلام الحلوة.. متكسر

قد ما أنا ماشي في طريق معكوس

وشايفك فيه مقابلاي بفتحة إيد

وأنت بعيد

قد ما بحاول أفك الجبس عن قلبي

ولو يوم واحد

قد القعدة على رصيف موقف دمياط الجاحد

قد آخر مرة شوفتك فيها ومشوفتنيش

حسيت بعمق الصورة من التشويش

وعمق الذكرى من اندثار الواقع

بقلبي الساقع..

الدافي..

إلي بيحن..

بيقتل بالسن..

في انتظار مبرر لتكرار الحلم

"استنساخ"

فكّرت في فكرة

لو سنحت ليًا الفرصة أقعد مع نفسي شوية

وحصل "استنساخ"

هنكون متشابهين في المعنى ولا مجرد الشكل

هيعاني تمام إلي عانيته..

ويشوف جوايا إلي بنيته..

هيحب يشوف أو هيخاف؟

هيقول بصراحة ويتكلم ويكون شفاف

أو هيزاور عن روجه

ويقولي زهقت أو تهت

أو نفسي أكون حاجة جديدة مختلفة تمامًا عن دلوقت

هيحن لقلبات المراجع؟

ولّا خيار الركب الهادي.. مُريح

هيهة الشوق لديح العيد
ولصور الإيد المدماه على سور البيت
أم إنه هيختار النوم.. ويكسل يفرح لو هيقوم
هيسابق أصحابه بعجلة قديمة
ولا هيمشي على المهل
هيشد في ياقة صاحبه في عركة
ولآ ده جهل!
هيفكر من أعماق المعنى
ولآ هيغريه التسطيح
من الآخر.. هيكون متسلم مع نفسه ويموت سطيح؟

أو هيخبط ويكسر ويزوم..
من عمق النوم لعمق الكون..
ومن العقلانية للجنون..
إلى الجلسة الأولى مع نفسه المستنسخة
التي اختارت السكون.. فلم تتحدث إطلاقاً
واكتفت بالنظرة الرءوم
لحال الزبون

"مُنْتَصَف"

الفجر شأشأ..

بسّ مطلعلوش نهار

كان جوّه غار.. محبوس

والزرع سأسأ..

بس من غير الخضار

إكمنه صار مدفوس..

حتى الفانوس

النور تواه جوّاه

والحفلة أضيّق من سميع الكُلّ

الزينة ساكنة في البيوت

أمّا الشوارع ساكنيها الضلّ

والمدينة عالية بس صوتها رّخيم

فالوحدة تتدلّدق على المساكين

(وكلنا مساكين)

الحترّ - يا محلاه - جلوس الأحرار

طول الليول حواديت
والظلم قطع العادة لما اختار
يكسر فجأة صوت البيت
دلوقتي تو حشكوا ليالي صغار
تفتكروا أيام كنتوا بتنسوا العيد
بأعيد..

فكرة وجود المنتصف دايمًا
ما بين إنصافه أحيانًا.. وبين إحجافه
ما بين ما بيظهروا لينا.. وبين إليي محدش شافه
بيظهرلي بوضوح الفرق بين الوحدة والخلوة
وبين الاختيار والفرض
وبين تراتب الأحداث العادي ووضوح السرد
وبين المعجزات في الأزمنة المحتاجة
ونصف المعجزات في الأزمنة العاده
وامثال الشيء على قدر الحاجة

(نصف قطر الدنيا): هو الخط الواصل ما بين قلبنا
(وبرجلها) هي عوامل اكتمال حُبنا



(قُطر الدنيا): هو كل شئ بيتني بنا

(نصف الدائرة): كوشة من سندس وإستبرق

(والدائرة الكاملة): ترمز للمصير المُفبرك

بوهم الكمال..

المتصف أثبت أحقيته بالدلال



"ذاكرة انتقائية"

الميموري كارد المسؤولة عن التوهية

مسألته نفسك

ليه كل حاجة مهمة مُقترنة بتاريخ؟

بدايات الحروب..

ونهايتها..

دخول السجن.. الخروج.. التفاد..

إلي ساب.. إلي جاب..

الحكايات القديمة..

الحبيبة اللثيمة..

دفاتر اليوميات المسطرة..

جوابات الطرد من المدرسة..

والخروجات إلي مفيهاش منظره..

الأحضان..

الرسايل الأولى..

التقلبات المألولة..

الإجابة:

بتلاقيها في الخوف أوقات وفي الترقب أوقات
الخوف بيخليك تحفظ التاريخ إلی جايز ميكررش
والترقب بيخليك تحفظه عشان متقصّرش
الموضوع أشبه بأهمية توقيت الظرف
في تحديد منعه من الصرف
مسألتنش نفسك
ليه أوقات بتنسى التاريخ رغم الأهمية؟
"الذاكرة الانتقائية" أحياناً بتكون عارفة مصلحتنا
بتسبلنا تواريخ ضامنة إنها هتفضل في بيتنا
ويتمسح الباقي بمزاج
التقدير..
على حسب المساهمة دلوقت
مش على ما فات
التاريخ إلی بكتب فيه دلوقتي
حافظه كويس
يعني الوصول للثبات
بعد سنين من التحيز
ويعني لغيري

الإحساس بالأمان بعد التَمَيُّس
ولغيره التَمَيُّز

المهم .. هيعني لحد
وبالمناسبة ممكن ميعيش
الناس وصفت التاريخ بالحسبة غلط
وشايف دا تكييس
التاريخ حنّس وشجاع
ومبيخسش الجميل
مكتوب على يُفَظ أسماء الشوارع
بالدليل
وعلى دبابات الحرب
بدم القتل
وعلى قلبي المفجوع
بالعليل

شايف إنه ملوش مثيل
وبحبه بصراحة

وبقول منكتبوش في المقابر
عشان بيخاف
على الأقل نحطله كشاف.. ينور طريقه
ونسبله تاريخ تاني رفيقه
ودي مش جباية
لكن رد لجميل
إنه نورلنا الأحداث
وكتب إلي حصل فيها بالمقاس

"السلام والكلام"

راس حسن إلي مَلَّست عليها لَمَّا شوفت فيه نفسي من سنين / رد فعل صديقه وهيا
بتعمل غلط وبتقول.. في كمين / رد فعلي وأنا بضحك بصدق وكذلك بكذب /
زرعي إلي لحقته بالمية قبل ما ينطق ويدب /
نوبات ثنائي القطب القصيرة..

بحاول باستماتة..

أخاوي خيال مآته..

وأتعلم السكوت..

أفضل بين الحكاوي وأمير البلاوي..

قبل ما تصبح ثُبُوت..

أطهر الأيام بخوفي..

واتنسف فأنسف ظروفي..

واتخوك بالعادي خالص..

فأقتدرع المستحيل..

اقلِسْ م الشُّبهَة بِأني ..

أبقى جِنِّي .. يَخْتَفِي ووراه المحال

يَحسبوه خَوَّاف بيجري ..

يَحسبوه خَوَّان وَفُجْرِي ..

يَحسبوه وما يَحسبوه ..

لو يهमे إنه يسيبوه ..

عُمره ما يَحقق أمانِي

ارفع إيديك بالحق زيَّ خيال مآتة

وامشي بين المهلكات تاتا تاتا

واتملي بالصدق

فات كتير على فعلنا للشئ عشان من جوّه حابينه

على الأغلب بنعمله عشان ندينه ونهينه

وتقول عملنا ..

كان أولى نعمل للحياة الخالدة

كان أولى نتجلد على الأرض ميت جلدة .. ولا نتجلد فوق

نمثل للحياة بالذوق

ومنزقش

اليوم فضحت واتفضحت ..
وُخِوت وُخِوت ..
وُدِّقت من القدر وشرقت ..
وأدركت المراد (بالشيفت) ..
وتبادل الأدوار

فشلت في المسرح عشان لما بشوف نفسي مكان غيري .. بنهار

ولما بيزيلوا الستار .. بتلبخ .. وأنسى الكلام
مشكلة التخدير ..

إنه بيوهمك إنه مفيش آلام
مشكلة العالم ..

الكلام

مشكلة السلام ..

الاستسلام

مشكلة كل المشاكل في الجموح وفقدان اللجام

أول مرة خيال مآته يتكلم

يبدأ كلامه بالسلام ويسلم
ويَمَلِّي عينه في الحضور
معرفش ايه تاني هنعمل
لولا نَطَّقنا الخيال
لولا سممنا الطيور
خلق مصطلح الطابور معلمش الناس أهمية الدور
خلق مصطلح العقاب ممنعش الناس عن إساءة الأدب
نَسب كل حاجة لكلمة (رد فعل)
مكتذب

"عن المحبة" غزيمة الضعاف..

بشترى الأيام بغيرها
ومين هيضمن تبقى غيرها
بشترىها ومش باصرها
بس مستسلم تمام
قالوا واحنا صغار نصايح
كلها بتبدأ ب اسعوا للأمام
الأمام.. مليون ضباب
والأمان.. طالب صحاب
والصحاب.. طالين شباب
والشباب.. مكتوب غياب
في الدفاتر.. بالتواريخ الجديدة
وعد للناس المريضة

إنها غُمَّةٌ وتعدي

وعد للناس السريعة

إنها لازم تهدي

ودا ضمائها للوصول

خُصَّتْ معظم التجارب

ولسه مش واجد حلول

لسه مش لامس معاني المشكلة

التمهّل فإني مش لازم أسهّل

بس مش لازم أصعب

شعري شابت خُصله فجأة

بس لا يعني إنه جعد

لسه فيه رمتق البقاء

لسه فيا مني داء

لسه جوايا الدوا



لسه فيا مني شئ

شكله قرب يستوى

لسه فيه من الدنيا طيف

بس مش هيكون مخيف

لو قدر يجمعنا سوا

بشترى الأيام بسيف

ولما أبيعها بكون هوا

وكلي هون

يا خسارة الدقون

لو هتقدر السنون تضحك عليها

ايه منابك م اللباقة

لما بتمسك ايديها

ايه منابك م السما

غير ملامح النجوم

ايه منابك من عينيها



غير منهاها من عينيك

اياه إلي سهاها المداورة

واياه إلي سهاها المناورة

واياه إلي سهاها المحبة

واياه إلي سهاها السلام

كل دا أصلاً كلام

رمز عام لإجتماع الأمنيات

واجتماع المعجزات

واجتماع المؤنسات

واجتماع الموحشات

واجتماع كل الحاجات

من وصال الروح لحد البوح

لحد ترجمة السفوح

والوصول للقمم

الحب الممثل الدّمثُ للتصميم والهَمَم.. والنجاة

سَجَّادَةُ الْإِلَهِ

وَعَنِيْمَةُ الضَّعَافِ

للكام حد بالعدد إلی سابولي أكثر ما خدوا مني ..

سواء بالقلم عشان بيعرفوا يكتبوا ..

أو بالمدد عشان بيعرفوا يوهبوا ..

أو بالبعد عشان بيريجوا ..

ويرتاحوا ..

"سليقة الألم"

دلوقتي بكتشف انعدام الذكاء جوايا

كذب المرآية ..

وشكلي الوحش ..

بشوف الحاجات بصدق عجيب

وأمسك ضميري على كفيّ

أشوف الكام سنة إالي فاتوا

فأدعي ربنا وأتخفي

وأقول بتعلم

كل سنين التذكيرة دي ونفسي أكون صبي

مطمحش لمعلم

كُتر المعارف علمني أسلم

ومعلمنيش أحب

دلوقتي بتمطع بعافية

عيني مليانة ودافية

عشان شوفت الحقيقة

أول مرة أقع على راسي ومتوجعش



الآلم أوقات بيراعي الشعور

بيتأخر في الحضور

لحد ما الآلم القديم يخف

شايف حمام بيلف

معرفش فرحان ولا ييهرب

شايف ورود

معرفش بتزف ولا بتخرب

شايف معاني حقيقية مش خاضعة للقسم

شايف ندوب في الجسم

وندوب في الزمن

وندوب في الناس

ندوب حية ومجفتش

انجذابي للآلم خلاني محستش

أول مرة أخاف اتباس

من عدوى "الغير آدمية"

أول مرة أبص لفتحات التهوية

وخايف من الهوا



الضرب المستمر مدانيش فرصة استوى
ومع ذلك بحاول..
بفرش سجادة الصلا بليل
وأقول
وأناجر مع ربنا
وأفرش سجادة المعاصي الصبح
وأناجر مع الناس
أخذ عهد على نفسي
فأخون العهد وأحتاس
المشكلة في الأساس من الأول
في الدنيا إالي سكتت كتير لحد ما الغلط طول
مورتناش المسير من بدري
دلوقتي هرمي نفسي للي جاي وأجري
وأنسى إالي فات
هتوب عنه
وأتمناه يتوب عني
هعاهد وهصدق
هصادم وهجرى



هصلي وهبرق بالبصر
هكون صادق لأخر دقيقة
هواعد البنت الجريفة.. إالي مبتكدبش
ومش هكذب عليها
هرجع تاني طفل بييدي السليقة
ومبيندبش



"يوفوريا"

اليوفوريا دي نشوة ظريفة في الحاجات إلي بنحبها؛ لكن الغريب إني لقتها في

الأحزان

(ليل حزين)

الصمت مَلَّ من صمته

فأتجه للمزيكا

وأنا مليت

فبكيت

الليل لا يحتمل شكواي

عنده هموم وعيال

وفاتورة كهربا

الظلمة بتحاربه

وهو بينادي الصبا

في الصبح

والصبح مشغول

في توفير الحلول



وإشغال البشر
قدامي طريق سفر
وطريق سَقَر
رغم إني من المصلين
هموت من التخمين
نزيف المخ
بيسر سب أفكار
الدمار
والخوف
والخسوف
وانعدام الرؤية
انعدام الرؤى والمعنى
نزيف القلب
بيقول إنه: مفيش فرصة لرجوعنا
لكن حاولوا تكونوا خفاف
قلبي دلوقتي شفاف
مبيكرهش حد
لكن مبيحبش



ملوش أنداد
مبيصُيش
قساه على حد
كفاه إنه مريض
بما هو أشد
بالخوف
الخوف بيقتل الظروف
بيقتل الشعور
بينخر في الجذور
ويئص الدم
لكن أوقات بيكون أحن
من الحنين نفسه
لما بيدلنا على منافسه
وبيزقنا رقة
النور البسيط من شيش الشقة
والمزيكا بليل بعد مشقة
والبوسة المستخبية إالي مطالتهاش المنقة
والحضن الكبير..



النشوات البسيطة
إلي بتدخ في أرواحنا كثير
وبتنتهي بينا للنوم الهادي في عمق السرير
في الأول كنت ساخط
ودلوقتي شايف الدنيا بخير
ودا حالنا بتساعنا الدنيا لما مش بتساع
وبتساعها لما مش بتساع
ودي قيمة عدم دوام المتاع
عشان هنبغي في الأرض
الدنيا قرض
بناخد فيه من ربنا
ويعتبر مبنديش
أوقات بقول: أنا نفسي أعيش
أوقات بقول: أنا عاوز أنا
بحلم بنفسي في الأمام
فأقدر
وأحلم بنومي في المقام
فأنتصر





وأقول: هموت وَيَّ
وأحلم بإن الظلمة دي بتنجلي
وأحلم بإني مطمئن

كأن الدنيا طابق دومنه
وأنا الوحيد المضمن



"دياجة"

غريب إن المقدمات بقت تيجي في الآخر

ودا طابع جديد

سببه..

(سرعة التوقيت)

(وانجراف الحروف)

والخوف من الإسناد

ترك مساحة لتجربة الحاجات

من غير هروب مبدأي

الشقاوة مش في كونك شقي

إنما في كونك شقيت

الخريف خفيف

مش بحزن الشتا

الحبيب سخيف

مش بعمق الحبيب إلی قبله

لسه ويايا ويقابله

ببدأ بيه

وانتهي بيا
جدي شاف معاني الدنيا جليّة
قبل ما يموت
وتعمدت أشوفها بعد ما أموت
عشان أعيش السهل
ودا ممكن تعتبره جهل
أو علم بما لا يجب أن نعلم
الوجود مفعم بالغيبيات
شروء مسقي بالأرواح
جراح..
وقطن..
الكلام المكتوب على جدار السجن
عكس إلي شافه السجين
بنات بتلعب وتتراقص
ضحك لكنه ناقص
(مرسوم)
الكون قاعد على الكرسي
بيزوم

ويقتل في شنبه
ويعاكس الحلوين
يتلقحوا الوحشين
ويموتوا
في كوكب بعيد اسمه "بلوتو"
بيساعي المنبوذين
تركيبه الجوهري حاجتين
الآين والتلج
بياكل في جسمي البرد
وأخنخ بمناخيري
بقابل صحاب
تحت كوبري بعيد
نشرب ونعيد ونزيد
ونسي
نفرح ونطوف ونكيد
ونقسي
ونرتوي و نكوي
نضرب في بعض على سبيل الهزار

نضرب في بعض على سبيل الدمار
نكتشف بالضرب جوهر المحار
ياخذوا مننا العبرة الصغار
فيكتبوا..
ونبطل نكتب..
نشوف نفسنا فيهم
كل إلهي بيشقينا في الأغلب مش هيشقيهم
هيسسهلوا
وهيعيشوا
هيبقوا شعرا مش للناس
إنما ليهم
هيكبوا المقدمات في الأول
بأيديهم البريئة
دلوقتي واخداني السريقة
وقطتي بتونو
وعودي بيدوزن
وأنا جعان
هنهي الكلام



وهفضل معاك

عشان شبيهي

هرمي السلام وهترمي السلام

وهنتقابل في الحرب

كل إللي فات كان.. ضرب ضرب

وإللي جاي مش بعيد

نهاية كلامي السميح

وبداية كلامك

هسلم وداني للسانك

لتنهي الكلام

المرّة دي من غير سلام



أخيراً.....

لِ الزرع إلي في أوضة أبويا..

ولأبويا..

ولإثنين تانيين..

أنا..

وأنا بعد سنين..

لمن آمن بما أكتب.. وما آمن إلا قليل



دار نـوع النشر والنورع

جدول المحتويات

١	الإهداء.....
٢	"سَرَحْتُ فِي الْمَلَكُوتِ".....
٦	"لِ الْأَمَانِي الْمُمْكِنَةِ وَالْغَيْرِ مُمْكِنَةً".....
٩	"غَائِبِينَ".....
١٢	"خَمْسَةٌ وَخَمْسِينَ".....
١٦	"عَلَامَةُ اسْتِفْهَامٍ".....
٢١	"رِسَالِ الْجَدْرَانِ".....
٢٥	(مُرْتَجَل).....
٢٦	"الْقَضَايَا الْمُسْتَضْعَفَةُ".....
٢٩	"آيَةُ الْإِيمَانِ".....
٣١	(مُرْتَجَل).....
٣٢	"كَنْزُ الرَّحْلَةِ".....
٣٦	(مُرْتَجَل).....
٣٧	"أَحْلَامٌ".....
٤٠	"أَقْرَبُ طَرِيقٍ لِ الْبَرِّ".....
٤٤	"أَصْدَقُ مَعَادٍ".....
٤٨	"مَادِيَةٌ مَرُورُ الْوَقْتِ".....
٥٣	"خَبِيْطُ النَّجَاةِ".....
٥٧	(مُرْتَجَل).....
٥٨	"ضَرْبٌ".....
٦٢	"عَلَى الْمَاشِي".....
٦٧	"الْمَوْتُ.. وَمَا بَعْدُ".....

٧٣	"جرافيت"
٧٧	(مُرْتَجَل)
٧٨	"الجوع"
٨٠	"الفصُّ الخامس"
٨٤	"ذكرى تأبين تشرين"
٨٩	"الكابوهات الجُداد"
٩٣	(مُرْتَجَل)
٩٤	(مُرْتَجَل)
٩٥	"أهواء الانتحار"
٩٨	"كَلَامُنْجِي"
١٠١	"الشغب البرئ"
١٠٥	"سَهَّارَة"
١٠٩	"صوفية"
١١٤	"الوثيقة"
١١٦	"إذا صَرَبت فأوجع"
١٢٠	"دوشة صباحية"
١٢٧	"فُصاصات"
١٣٠	"حَتَّى أضعف الإيمان"
١٣٥	"عشوائي"
١٣٨	"ريشة"
١٤٢	"غيث"
١٤٦	"استنساخ"
١٤٨	"مُنْتَصَف"
١٥١	"ذاكرةٌ انتقائية"
١٥٥	"السلام والكلام"



١٥٩.....	"عن المحبة"
١٦٤.....	"سليقة الألم"
١٦٨.....	"يوفوريا"
١٧٣.....	"ديباجة"

